

36-064
2



ჟუჟნი
ბეჟნი

აქ
თავთ
ბეჟნი
ჰი



საქართველოს
საქართველოს



დავით ბაქრაძე

ქ ყ ჳ ნ
ს ა ჳ ნ



ქართლის

ნაგრობი

კ. მ. მ. მ.



..ნ ა ჳ ნ ყ ჳ ნ

1 9 6 8

საგვ-2000
 შიშოვანაშვილი

მუშნი ლავრენტის ძე ხაშბა დაიბადა 1903 წ. ოჩამჩირის რაიონში—სოფელ ფოქვეში. 1915 წ. ფოქვეშის სამრევლო სკოლის დამთავრების შემდეგ შევიდა ოჩამჩირის დაწყებით სასწავლებელში, შემდეგ სწავლა გააგრძელა სოხუმის სამასწავლებლო სემინარიაში. 1927 წ. დაამთავრა მოსკოვის შურნალისტიკის ინსტიტუტი. რამდენიმე წელი რედაქტორობდა აფხაზურ გაზეთ „აფსნი ყაფს“ და ამავე სახელწოდების ლიტერატურულ-მხატვრულ შურნალს.

მ. ხაშბამ შემოქმედებითი მოღვაწეობა 1919 წ. დაიწყო. იგი ცნობილია თავისი ლექსებით და მოთხრობებით. თარგმნის მხატვრულ და პოლიტიკურ ლიტერატურას.

მამითათის ნაამბობი

უიკრიკმა აჩირხამ სოფელი კარდაკარ ჩამოიარა და ყველას გამოუცხადა, ხვალისათვის თავყრილობაა დანიშნული, რაიონის ხელმძღვანელები უნდა გვეწვიონ და არავინ დააკლდესო. მეორე დღეს კვირა იყო და ხალხმა სოფლის საბჭოს წინ დილიდანვე მოიყარა თავი. სამკითხველო მორთულ-მოკაზმული ახალგაზრდებით გაივსო. აშრიალდა ახალი ჟურნალ-გაზეთები, ქალებმა და ვაჟებმა ჯერ მორცხვად დაუწყეს ერთმანეთს ლაპარაკი, მერე გათამამდნენ, მასლაათი გააბეს. გამრავლდა მარილიანი სიტყვა და სიტყილი.

სოფლის საბჭოს წინ ადამისდროინდელი ცაცხვი იდგა, ფართოდ ტოტებგაშლილი. ამ ცაცხვის ქვეშ, ხის ფესვებზე, მოხუცები დამსხდარიყვნენ, ყალიონს აბოლებდნენ და თან ტკბილად მუსაიფობდნენ.

მოხუცებში იჯდა ორმოცდაათ წელს გადაცილებული
ტიუბა მაქითათი. მას ლამაზ-ლამაზი ამბების თხრობა
ვარდა და მსმენელიც არასოდეს ელეოდა.

მოხუცმა გირჯინბა ოსმანმა ქამარზე დაკიდებული
ოქროსფერი ქისა გახსნა, დაჭრილი თამბაქო სამი თითით
ამოიღო, ყალიონში ჩატენა და მაქითათის მიუბრუნდა:

— პეი, მეზობელო, რა ხანია შენი ამბები აღარ მომის-
მენია, მოდი ერთი, გაგვამხიარულე.

მაქითათიმ განგებ იუარა, მაგრამ ახლა სხვებმაც
სთხოვეს და მოხსნა გუდას პირი.

— ყველა საქმეს თავი აქვს და ყველა ამბავს თავისი
დასაწყისი. თუ ამბის დასაწყისი თავიდანვე არ გიამბუთ,
ისე მის ბოლოს ვერაფერს გაუგებთ. ახლა ისეთ რამეს მო-
გიყვებით, რაც ჯერ არავისთვის მითქვამს. ბევრი რამ გა-
დამხდა ცხოვრებაში. უამრავი შეცდომა ჩამადენინა ჩემმა
უთაურობამ, მაგრამ ვაი, რომ მათი გამოსწორება აღარ
შემიძლია. მხოლოდ ერთიღა მანუგეშებს: ახალგაზრდებს
შეუძლიათ ჩემს შეცდომებზე ისწავლონ. წინა კაცი უკანა
კაცის ხიდიაო, ნათქვამია. მე ჩემს ამბებს იმიტომ ვყვები,
რომ ხრამზე ხიდად გავდო, რათა ცხოვრების გზაზე მიმა-
ვალმა ჭაბუკმა სწორედ გაიაროს და ხრამში არ გადაიჩე-
ბოს.

— ჰო, ჰო, ნუ გაჭიმე, დაიწყე ბარემ. ნუ გეშინია, რა-
საც კარგს გავიგონებთ, შვილიშვილებს გადავცემთ, —
უთხრა ოსმანმა და ჩიბუხი კბილებში გაიჩარა. მერე ტალ-
ზე აბედი დაადო, კვესი ჩამოჰკრა და ქვას ნაპერწკლები
გააყრევინა. აბოლებული აბედით ჩიბუხი გააჩაღა.



მაქითათიმ შუბლი მოისრისა, მცირე ხანს ჩაფიქრება და

დაიწყო:

— ძველად ასეთი კი არ ვიყავი, ახლა რომ ვარ. მთელი ჩვენი მხარის ქალიშვილებს ჩემზე ეჭირათ თვალი. გოგონებს პირველ დანახვისთანავე გულში ვუვარდებოდი, ბიჭებს ჩემი თოფ-იარაღის შურით გული უსკდებოდათ. ჩემს ხორლას ბადალი არ ჰყავდა აფხაზეთში. უჩემოდ ქორწილს არავინ იხდიდა და ქელებს. ხალხი თავადიშვილებში არ მარჩევდა. გალადებული და გაყოყლოჩინებული არხეინად დავაჭენებდი ცხენს აღმა-დაღმა. ბევრ ქალიშვილს დავუკარგე ჭკუა და მერე მშრალზე დავტოვე. როგორი ლამაზი გოგოც არ უნდა ყოფილიყო, ოღონდ ერთი ენა დამესველებინა, ამაღამ ცოლად გამომყევი-მეთქი, მაშინვე ცხენზე შემომიჯდებოდა და ჰაიდა! მაგრამ აპ... ამ ამბავმა მეც თან გადამიყოლა. მაშინ რომ ჭკუა მომეხმარა და ცოლი შემერთო, ქვეყანაზე ასე გაუბედურებული აღარ ვიქნებოდი. თქვენსავით მეც მექნებოდა ოჯახი, მეყოლებოდა ჯალაბი, დავტკბებოდი შვილიშვილების ცქერით. მაგრამ რას ვეწიო ახლა? დროს და მდინარეს უკან ვერავინ დააბრუნებს. ცოლის თხოვა რომ დავაპირე, უკვე აღარავინ მომწონდა. ზოგზე ვამბობდი, ნეხვის სოკოსავით გაზრდილია-მეთქი, ზოგს გვალვის შვილი შევარქვი, ზოგიც იმიტომ დავიწუნე, რომ მდაბიო გვარისა იყო. თურმე როგორ ვცდებოდი! ჩემს დაწუნებულ ქალიშვილთაგან ერთიც არ დარჩენილა შინაბერად. ყველას გაუჭრა ბედ-იღბალმა, ყველა გათხოვდა თავის შესაფერისზე და ბედნიერი ოჯახი შექმნა. მამაჩემის სიკვდილის შემდეგ მაინც სულ მარტოდ-მარტო დავრჩი.



მაქითათიმ რკინის წვერიანი ჯოხით ისე დაუწყო წას ჩხვერა, თითქოს მისი უბედურების მიზეზი ის ყოფილიყოს.

— ნუ გეშინია, მეზობელო, — დააიმედა ჯანგიათამ. — ამბობენ, მალე ხალხი კოლექტივში გაერთიანდებაო, შენც შეხვალ კოლექტივში და მარტო აღარ იქნები არც ყანაში და არც სუფრაზე.

— ჰო, ეგ თუ მიშველის, თორემ მალე ჩემით ღომსაც ველარ მოვაცოდვილებ და შიმშილით ამომძვრება სული. ახია ჩემზე. ხომ გაგიგონიათ, რაც მოგივა, დავითაო, ყველა შენი თავითაო. ახლა რომ მაგონდება, ახალგაზრდობაში რაც ჩავიდინე, ჩემი თავის თვითვე მრცხვენია. აი, აქ თითქმის ყველანი მოხუცები სხედხართ და აღბათ გემახსოვრებათ ჩვენი სოფლის განაპირას მცხოვრები ხაკუცა ტყუაზბა. ხაკუცა თუ გახსოვთ, ისიც მოიგონეთ, რა ლამაზი ქალიშვილი ჰყავდა. ის ქალიშვილი ახლაც თვალწინ მიდგას. ვარსკვლავებს ეთამაშებოდა. ერთი შეხედვა საკმარისი იყო, რომ კაცს შეჰყვარებოდა. გუბხანაში პირველად მაშინ ვნახე, როცა ქალიშვილობაში შედიოდა. ვნახე და შემეყვარდა.

გუბხანაშის მამა ერთი ღარიბი კაცი იყო, აღბათ გახსოვთ, უჭირდა ქალიშვილის აღზრდა და დედულეთს გააგზავნა, თავის ცოლისძმასთან.

გუბხანაშის ბიძა ნავსადგურში მუშაობდა მეკურტნედ. თურქეთიდან მოსულ გემებს სცლიდა და ტვირთავდა. მცირე შემოსავალი ჰქონდა, მაგრამ რასაც იშოვიდა, მომჭირნებოდა და თავისი ჯამაგირით არა მარტო არჩენდა დისშვილს, ასწავლიდა კიდეც.

ერთ შემოდგომაზე სოფელ წყუარაში მაცრად დამბა-ტიყეს, ვხედავ, ის გოგოც იქ არაა! გულში ისეთი ცეცხლი ამენთო, კინალამ დავინაცრე კაცი. მაშინ საბოლოოდ გადავწყვიტე, ან ამ გოგოს ვითხოვ, ან არავის-მეთქი. იმანაც ერთი ისეთნაირად შემომხედა, თითქოს დამიდასტურა ნათქვამი, ნუ გეშინია, მეც შენს ტაფაში ვიწვიო. მეტი რა მინდოდა! იმ დღეს ჩემს სულში სიხარულისა და ბედნიერების ქორწილი გაიმართა. ამბობენ, მხოლოდ ყური გააჩინა ალაჰმა სასმენელადო, მაგრამ, ჩემი ფიქრით, არაფერს არ შეუძლია ისე კარგად მოსმენა, როგორც გულს. გულს ათასი თვალი და ათასი ყური აქვს. ხშირია შემთხვევა, კაცი შენს ახლოს ლაპარაკობს და არ გესმის, მაგრამ შენმა სატრფომ სადღაც შორს რომ წაიჩურჩულოს, მაშინვე გაიგონებ, გაიგონებ გულით და ამის გამო უცნაური ჟრუანტელი დაგივლის. აი, ასე იყო იმ დღეს. სადაც არ უნდა ყოფილიყო გუბხანაში, მისი ხმა მესმოდა. გუბხანაში ფანდურის ლარებზე ბროლის თითებს ათამაშებდა და ასე მეგონა, ფანდურის ნაცვლად ხელში ჩემი გული უკავია-მეთქი. მღეროდა გუბხანაში და ჩემი გული იმეორებდა ამ სიმღერას. ის ხმა ახლაც კი გალობს ჩემს სულში. მართალია, ხანდახან ექიმის დანასავით მჩხვლეტს, მაგრამ ეს ჩხვლეტა ალერსზე მეტად სასიამოვნო მეჩვენება. რაღა ბევრი გავაგრძელო, იმ ქორწილში ჩვენმა გულებმა ერთიმეორეს გასძახ-გამოსძახეს და დიდი იმედით ფრთაშესხმულნი მეცხრე ცაში გაფრინდნენ.

მაგრამ ეს წუთისოფელი განა დიდხანს გაახარებს ვინმეს! ზოგს თავის სისწორე ღუპავს და ზოგს — სიმრუდე. ზომ იცით, ოდითგანვე სოფელი ჭორიანია. ხალხმა ოღონ-



დაც საბაბი იშოვოს და ერთ წვეთს ზღვად აქცევს, ბუნებრივად აქლემად გახდის. ჭორი ჰგავს მთიდან დაგორებულ მთის გუნდას, თანდათან რომ იზრდება და ბოლოს ისეთ ზეგავად იქცევა, რომელიც ყველაფერს გლეჯს, რაც გზაზე შეხვდება. აი, სამყარო ხომ დიდია, ჭორი იმაზე დიდი ხდება ხოლმე. ხალხმა ჩვენი, მე და გუბხანაშის სიყვარულიც საჭორაოდ აქცია, გაწელა და გაჭიმა. ზოგი აღაშფოთა კიდევ ამ ამბავმა, დაგვიწყეს გაკილვა და დაძრახვა. სულ ჩვენზე ტუტუნებდნენ, თითქოს სხვა საქმე აღარა ჰქონდათ: „გაიგეთ, რა სისულელეს სჩადის ხაზართ ტუიბას შვილი, თურმე ტყუაზბა ხაკუცას ქალიშვილს თხოულობს, ცოცხლად მარხავს თავის გვარს. ამ უგვარო და უსახელო კაცის ქალიშვილი რომ არ შეირთოს, ქვეყანაზე კარგი ქალიშვილები გაწყდა?“

ბოროტი ენები ცეცხლს უნთებდნენ ჩემს ბიძაშვილებს, მიმხედრებდნენ და ერთ დღეს მთელმა ჩვენმა ნათესაობამ მამაჩემის ეზოში მოიყარა თავი.

ეზოში აი, ასეთი მაღალი ცაცხვი იდგა, იმ ცაცხვის ქვეშ ჩამოსხდარმა ტუიბებმა პირველად მე და მამაჩემი ახლოსაც არ მიგვიკარეს. მამაჩემი გულმოსული მიუჯდა ბუხარს, წამდაუწუმ ჩიბუხს ტენიდა და განუწყვეტილვ აბოლებდა. დანა რომ დაერტყათ, წვეთი სისხლი არ გამოუვიდოდა. თავჩაქინდრულს ცხვირ-პირი ჩამოსტიროდა. იმ დროს დედაჩემი უკვე აღარ იყო ცოცხალი. მე ტახტზე ვიყავი გამოტილი, გულზე ხელებდაკრეფილი ვფიქრობდი და ვფიქრობდი გუბხანაშზე.

ჩვენი ნათესავები დილიდან საღამომდე რაღაცაა ჩურჩულებდნენ. მამაჩემი ისევ ჩიბუხს აბოლებდა და ბუხარში

აპურტყებდა. მე კი ამ ხნის განმავლობაში რა არ ვიფიქრებ ხან გადავწყვიტე, ჩემს სატრფოსთან ერთად სადმე უცხო მხარეს გავქცეულიყავ, სადაც არავინ გვიცნობდა, ხან ვინატრე, ნეტავი გუბხანაში ხაკუცას ქალიშვილი არ იყოს, ნეტავი ვინმე მემამულეს მისთვის ქალიშვილი აღსაზრდელად მიეზარებინა-მეთქი. ეჰ, მაშინ ხომ ყველა შემაქებდა: კარგი ვაჟკაცი ყოფილხარო. შენა ხარ ჩვენი გვარის ბედნიერი შვილი და ამამალღებელიო. სადაც არ უნდა გამოგჩენილიყავი ამ დროს, პატივისცემის ნიშნად ხელში ამიყვანდნენ და ისე მატარებდნენ. ეჰ, ფიქრს რა არ შეუძლია, მაგრამ მისი აშენებული ქვეყანა ხომ ერთ წამში იმსხვრევა ისე, რომ მისგან არაფერი რჩება! ასე დაემართა ჩემს ოცნებასაც.

საღამოზე ნათესავებმა ჩემი ტოლი ჭაბუკი მოგვიგზავნეს. მე და მამაჩემი გვიხმეს: ჩვენი აზრის მოსასმენად ცაცხვქვეშ მოზრძანდითო.

მივედით.

— ეჰ, ჩემო ხაზარათ, ერთი შვილი გყავს და ისიც ვერ გაგიზრდია რიგიანად, — მისვლისთანავე მოგვახალა მოხუცმა მიხამ და გაიმეორა: — ვერ გაგიზრდია, ვერა, რიგიანად.

მერე გვერდით მჯდომს მიუბრუნდა:

— ხუსენ, ხაზარათს ჩვენი გადაწყვეტილება აუწყე.

ხუსენი, ღმერთმა აცხონოს, სახელგანთქმული კაცი იყო, ლაპარაკიც კარგი იცოდა, ოქროპირს ეძახდნენ. კარგ მსროლელ ჯარისკაცსა ჰგავდა, სიტყვას ყოველთვის ზუსტად არტყამდა მიზანში.

— ჩემო ხაზარათ, — დაიწყო მან დინჯად, — ეს ხალ-

ხი უსაქმური კი არაა, მაგრამ ისეთი რამ მოხდა, საქმე, მიგვატოვებინა და შენს ეზოში შეგვეყარა, შეგვეყარა ავიწმინდის განსასჯელად. მთელი დღე ვთათბირობდით, საქმეს ხან ისე და ხან ასე ვწონიდით და საბოლოოდ ყველა ერთ აზრზე დავდექით, ერთი დასკვნა გამოვიტანეთ: შენს შვილს სურს ჩვენი გვარის შერცხვენა.

მამაჩემი გაფითრდა, მე კი გულში ცეცხლის ქარბორბალა დამიტრიალდა, სუნთქვა შემეკრა. ხუსენი კვლავ განაგრძობდა:

— ჩვენ, ძმაო, უბატონო გლეხები ვართ, თავისუფალნი. აქამდე ჩვენი სისხლი არავის აუმიღვრევია და თუ ვინმე მოინდომებს ამას, ნებას არ მივცემთ. თუ შენს ვაჟიშვილს ცოლის თხოვა მოუნდა, ქვეყანაზე განა ჩვენი გვარის შესაფერისი ქალიშვილი ცოტაა? მოიყვანოს და დავლოცავთ. რა გაუჭირდა ისეთი, რომ მაინცდამაინც ყმა-გლეხის და მეკურტნის ოჯახიდან გამოსულ ქალიშვილს გადაეკიდა! ვერა და ვერა, ამის ნებას ვერ მივცემთ!

ხუსენმა კიდევ ბევრი ილაპარაკა, მაგრამ მე აღარაფერი გამიგონია, გვიან მოვედი გონს და მხოლოდ მის ბოლო სიტყვებს მოვკარი ყური:

— თუ შენი ვაჟიშვილი არ დაიშლის და იმ გომბიოს შეირთავს, ჩვენ შორის ხრამი გაჩნდება. როცა მოკვდება, არ მოვალთ სატირლად. ჩვენთაგანი მოკვდება ვინმე და არ მოგიშვებთ მის სატირლად. ამას სხვები კი არა, შენი ღვიძლი ძმები და ბიძაშვილები გეუბნებით. თუ გინდა ჩვენი გვარიდან გაირიყოს, დაარღვიე ეს სიტყვა, თუ არადა დაემორჩილე ჩვენს გადაწყვეტილებას.

— ჰო, ასე უნდა იყოს, ასე!—წამოიძახა ყველამ ერთ-

ხმად.

მათი ზუზუნი შხამივით ჩამელვარა გულში. ფეხი დაგ-
კარი და ეზოდან გავვარდი.

მეორე დღეს ჭორიკნები ისევ ალაქლაქდნენ. რაც ტუ-
იბებმა ჩვენს ეზოში ილაპარაკეს, ყველაფერი გაბერეს,
გადააბრუნ-გადმოაბრუნეს და ისე მიუტანეს ხაკუცას. ხა-
კუცა აღუშფოთებია ამ ამბავს, ხოლო მისი ქალიშვილი
დარდს მისცემია.

არც მე დამადგა კარგი დღე, ლოგინად ჩავვარდი და
ორი კვირა ვიავადმყოფე. როცა მოვრჩი, ვთქვი, გულს გა-
დავაცოლებ-მეთქი, ავიკიდე სიმინდიანი ტომარა და წის-
ქვილში გავეშურე. უკან რომ ვბრუნდებოდი, არანაას
მთის ძირში, წყაროს მახლობლად, მოულოდნელად გუბ-
ხანაშს შევხვდი. წყალზე იყო მოსული. რომ დავინახე, ცივ-
ნა ოფლმა დამასხა.

— მაქითათი, ეს შენა ხარ? — წაიჩურჩულა მან, თავი
მორცხვად ჩაღუნა და კოკა ძირს ჩამოდგა. მერე თავის თი-
თებს დაუწყო მტვრევა და წვალევა, დამფრთხალ შეველსა
ჰგავდა.

დავიბენი, არ ვიცოდი, რა გამეკეთებინა. მაშინვე ის
გავიფიქრე, ჩვენთანებმა რომ ვინმემ დამლანდოს, დაიღუ-
ბება მამაჩემი, ყველა შეიძულეებს-მეთქი და მივიხედ-მო-
ვიხედე, ხომ არავინ გვიცქეროდა.

ალაჰმა უწყის, ჩემი ასეთი აფორიაქება არ მოეწონა
თუ სხვა რამ, შევატყვე, რაღაც ეწყინა. ერთ ხანს გაშტე-
რდა. მხოლოდ ყელის ძარღვები უთამაშებდა. ალბათ მოზ-
ღვავებული ცრემლი ებჯინებოდა სასულეში და ახრჩობ-

და. ბოლოს თავი დაიოკა, შემომხედა და აცახცახებულ
ხმით მკითხა:

— მაქითათი, ძალიან შეცვლილხარ, ძლივსღა გიცანი,
რამ გადაგასხვაფერა ასე?

ენა ვერ დავძარი. სიტყვა ყელში გამეხირა.

უხერხული ღუმილი ისევ მან დაარღვია:

— მე უფრო ვაჟკაცი მეგონე. თუ ოდესმე ნამდვილად
გიყვარდი და ეს სიყვარული ანთებისთანავე ჩაღის ცეცხ-
ლივით არ ჩამქრალა, ასე არ უნდა მოგეხარა ქედი. მე
მჯერა, რომ არ არსებობს ძალა, რომელმაც ნამდვილი სი-
ყვარულის დამარცხება შეძლოს. შენს ნათესავეებს უფლება
აქვთ დაგიშალონ მათ გვერდით ცხოვრება, მაგრამ თუ მო-
ინდომებ, შენს ბედნიერებას წინ ვერ გადაეღობებიან.
ქალაქში წამომყევი, ერთად ვისწავლოთ და ვიშრომოთ,
მე არ მეშინია ცხოვრების. ჩემთან არასოდეს გაგიჭირდე-
ბა, იცოდე.

ეს სიტყვები ბრძანებას ჰგავდა, მაგრამ მხოლოდ მუ-
დარა იყო, სიყვარულით სავსე წრფელი გულის მუდარა.

წამით გადავწყვიტე, ფეხი დამეკრა და გუბხანაშთან
ერთად ქალაქში გავეტყუელიყავი, მაგრამ უშაღვე გადავი-
ფიქრე. წარმოვიდგინე, მამაჩემი რა დღეში ჩავარდებოდა
და შემეცოდა. მერე გუბხანაშის მეკურტნე ბიძა მომაგონ-
და. მომეჩვენა, თითქოს მისი კურტანი ზურგზე მეკიდა და
მძიმე ტვირთს ქალაქის ქუჩებში მე ვეზიდებოდი. შევშინ-
დი, შევცბი და იოლ ცხოვრებას ჩვეულმა კაცმა უარი
ვთქვი სიყვარულზე, საკუთარი გულის წინააღმდეგ წავე-
დი. იმ წუთში მე და გუბხანაში ერთიმეორის გვერდით

ვიდექით, მაგრამ ჩვენ შორის ისეთი მთა იდგა, ვერა და ვერ გადავლახავდი.

— გუბხანაშ, ჩვენი ბედის ვარსკვლავები სხვადასხვა ადგილზეა ცაში. წადი შენი გზით, ალაპმა მოგიმართოს ხელი, მე კი ჩემი გზით წავალ. რა ვქნა, ასეთი ყოფილა ჩემი ბედი. — ესა ვთქვი და მისთვის არც შემიხედავს, მოვტრიალდი და ბილიკს გამოვყევი.

— დაფიქრდი კიდევ, დაფიქრდი, შენს საბოლოო პასუხს დაველოდები, — მომესმა გუბხანაშის ცრემლნარევი ხმა, მაგრამ მე არც პასუხი მიმიცია და არც მივბრუნებულვარ. ვითომდაც არაფერი გამიგონია, ნაბიჯს აფუჩქარე და გავშორდი იქაურობას.

მას შემდეგ კარგა ხანმა გაიარა. გუბხანაში კიდევ დიდხანს არ მივიწყებდა: ხან დობილს დააბარა ჩემთან სიტყვა, ხან წერილი გამომიგზავნა, მაგრამ რაც უფრო მესიყვარულებოდა, მით უფრო და უფრო ცივ პასუხს ვუგზავნიდი. ბოლოს ალბათ გაგულისდა და ჩამომშორდა.

მე კვლავ არხეინად დავაჭენებდი ცხენს აღმა-დაღმა და ჩემი ნათესავების გულის ჭიას ვახარებდი — საცოლედ თავადის ქალიშვილს ვეძებდი. მაგრამ ამაოდ: თავადის ქალიშვილები შორიდან კი მიღიმოდნენ, მიცინოდნენ, მივიდოდი ახლოს და შენც არ მომიკვდე! სათოფეზე არ მიკარებდნენ, გამირბოდნენ, ცოლობა რომ მეთხოვა, ალბათ თავსაც გამიტეხდნენ.

კარგა ხანს ასე ვიხეტიალე და გვიან მოვედი გონს, რომ ამ ხეტიალში ოქროს წლები დავკარგე, ახალგაზრდობა მარტის თოვლივით შემომადნა ხელში. მერე საბჭოთა ხელისუფლება დამყარდა და გვარებს შორის ზღვარი წაი-

შალა. გუბხანაში ბევრჯერ მოვიგონე, მაგრამ რაღა დროს! არც გუბხანაში ჩანდა სადმე და აღარც მე გახლდით ცოლე ბიჭი. ასე დავკარგე პირველი სიყვარული და მასთან ერთად ჩემი ბედნიერებაც, აბა!

მსმენელებმა შეატყვეს, მაქითათი აქ აპირებდა თავისი ამბის დამთავრებას და დაუყინეს, გააგრძელეო.

— რაღა გავაგრძელო, მას შემდეგ გუბხანაში აღარსად შემხვედრია, — უარზე დადგა მაქითათი.

— აი, ის გვიამბე, დიდგვაროვანსა და მზითვიან საცოლეს რომ ეძებდი. ხომ იცი, არ მოგეშვებით და რას გვახვეწინებ! მიდი, მოჰყე, დრო მაინც ბევრი გვაქვს, — უთხრა ბაზალამ, რომელიც ამ დროს ცერით ყალიონში თუთუნს ტენიდა.

მაქითათიმ შეატყო, არ მომეშვებიანო და განაგრძო:

— რასაც ახლა ვიამბობთ, მოხდა იმის მეორე წელს, ჩვენში დიდი რომ მოთოვა. იმპერიალისტური ომი იყო მაშინ. სისხლის ტბორები იდგა, მე კი სოფელ-სოფელ დავჭენაობდი და მდიდარ საცოლეს ვეძებდი. ბევრი დავიღარაბა გადამხდა, მაგრამ გულს არ ვიტეხდი. წელანაც ვითხარით, ვინც მე მინდოდა, იმას მე არ ვუნდოდი, ვისაც ჩემი ცოლად გახდომა სურდა, მე არ მოვინდომე და გამიჩნდა დარდი. ეჰ, რა ცუდადაა მოწყობილი ეს წუთისოფელი! სიყვარულის საქმე ხომ სულ არეული აქვს ალაპს. ვინ იცის, რამდენს ვეცოდებოდი, რამდენი დარდობდა ჩემზე და მე აინუნშიაც არ ვაგდებდი მათ. ვინ იცის, რამდენის გამო დავიტანჯე, ისინი კი ჩემს ტანჯვას დასცინოდნენ. ვეძებდი ქალს, რომელიც სიყვარულის დიდ ცეცხლს ამინტებდა გულში, მაგრამ ასეთი არავინ ჩანდა. შეიძლება მი-

ზეზი ისიც იყო, რომ ერთხელ ჩემი გული უკვე გადაიხანძრა სიყვარულის ცეცხლით და ხელახლა ვეღარ აინთებოდა. ასე იყო თუ ისე, ჩემი ბედის ვარსკვლავს ვერ მივაგენი.

ერთხელ მეზობლისაგან გავიგე, სოფელ ჟაბნაში ცხოვრობს მდიდარი კაცი აიბა რაშიდი, რომელსაც ერთიმეორეზე უკეთესი სამი ქალიშვილი ჰყავსო. უფროსი გათხოვილია უკვე და ჯერი საშუალოზეა მიმდგარიო. ისიც მითხრეს, რომ საშუალო ქალიშვილს ზიზა ერქვა. ეს ზიზა უფრო მე დიდი ხანია შორიდან მიცნობდა და მოვწონდი კიდევ.

K36.2064

მირჩიეს: ბედი კარზე მოგდგომია და არ გაუშვავო. არიქა, ახლავე შეკაზმე ცხენი და პერი, ჟაბნაში გაფრინდო. მეორე დილითვე ცხენს მოვახტი და აიბა რაშიდისაკენ გავაჭენე. ქალის სანახავად წინასწარ მოვემზადე. წინდლით ცხენი საპნით დავბანე, უნაგირს ახალი ტყავი გადავაკარი. სამკერდულის თუ სხვა მოსართავის რკინები და ვერცხლეულის ბალთები სულ ქვიშით გავხეხე. გაუფერავე უზანგებიც არ დავტოვე. არც მე ვიყავი ნაკლებად მორთულ-მოკაზმული: ძვირფასი დიაგონალის შარვალი, აბრეშუმის ახალუხი და თეთრმასრებიანი წითელი ჩოხა მეცვა. წელზე ვერცხლის ბალთებიანი ქამარი მერტყა, ზედ მოსევადებული სათოფისწამლე და მოსევადებული ხანჯალი მეკიდა. ქამარში ისეთი დამბაჩა მქონდა გაჩრილი, ვინც დამინახავდა, შიშისაგან ელეთმელეთი მოსდიოდა. თავზე ბანჯგვლიანი ბოხოხი მეხურა. მხარზე ყაბალახი მქონდა გადაგდებული. ფეხზე უძიროები და ტარსიკონის პაჭიჭები მეცვა. უნაგირზე თასმით ება დაგორბე.

საქართველო
ეროვნული ბიბლიოთეკა

ლაგებული ნაბადი. ხელში ისეთი მათრახი მეჭირა, რომ დავატყლაშუნებდი, მისი ხმა ცაში წკრიალებდა. ერთბაშად ტყვიით, თავადიშვილებს არაფრით ჩამოგუფვარდებოდი. მათზე მეტი თუ არა, ნაკლები არაფრით არ ვიყავი. მერე რა, რომ გვარიშვილობა და ადგილ-მამული არა მქონდა? ეს ამბავი შუბლზე ხომ არ აწერია კაცს, ვინ რას გაიგებდა?

დამიხედებული მივაჭენებდი ცხენს: ასეთ ვაჟკაცს აიბას ქალიშვილი კი არა, ხელმწიფის ქალიშვილიც ვერ დამიწუნებს-მეთქი.

გლებები თვალს რომ მომკრავდნენ, მაშინვე განზე დგებოდნენ და მოწიწებით მესალმებოდნენ, ვიღაც დიდებული ვეგონე. ნაცნობებიც ველარა მცნობდნენ.

შუადღე იყო, ჩემი რაში ჟაბნაში რომ შევაგელვე. მაშინ ასეთი ფართო გზები კი არ იყო. ვიწრო საურმე გზით მივადექი უცნობ კარ-მიდამოს. ვხედავ, ჭიშკრისკენ წყლიდან მომავალი, მხარზე კოკაშედგმული ქალი მიდის. უკან ოთხი-ხუთი წლის ბავშვი თითქმის დედისმობილა მიადევს და ატამს ჭამს. ჭიშკართან მისულმა ქალმა უკან მოიხედა, ბავშვს დაუძახა, ნაბიჯს მოუჩქარეო. ბავშვი ბაჯბაჯით გაიქცა. ქალმა ჭიშკრის ურდული გასწია, გაალო, პირველად ბავშვი შეუშვა და მერე თვითონ მიჰყვა.

ცხენს მათრახი გადაგვარი, ჭიშკართან მივაჯდე და ქალს გადავძახე:

— სალამი თქვენდა! — უზანგებზე ავიწიე და მარჯვენა ხელი, რომლის მაჯაზეც მათრახი მეკიდა, მკერდთან მივიტანე.

— იცოცხლე, შენი ჭირიმე! — მიპასუხა მან, კოკაძირს დადგა და გახევდა. ალბათ გაუკვირდა, ამ უცნობ

ბატონიშვილს ჩემთან რა უნდაო. მისმა შვილმა ატმის
ჭამას თავი დაანება და ისიც გაკვირვებული მომაჩერდა.

— ერთი მითხარით, აიბა რაშიდის სახლი საითაა?

— იმ გორაკზე რომ დიდი კარ-მიდამო მოჩანს, ისაა.

ქალი აიბა რაშიდის სახელის ხსენებას მოერიდა. ალ-
ბათ რაშიდის გვარის რძალი იყო. მე მინდოდა მადლობა
გადამეხადა, მაგრამ არ დამცალდა.

— ჰეი, უფრთხილდი, კუკუნა, ძალღი მორბის შენკენ,
ძალღი! — აყვირდა ვიღაც ამ დროს.

ის ქალი, მე რომ მელაპარაკებოდა, უცებ დაფრთხა.
კოკა ეზოშივე მიატოვა, ბავშვს ხელი დასტაცა და სახლ-
ში შევარდა.

ვერ გავიგე, რა მოხდა, ადგილზე შემოგტრიალდი და
გავიხედ-გამოვიხედე.

ქალები და კაცები ქვების სროლით ვეებერთელა
ძალღს მოსდევდნენ, მაგრამ ვერ ეწეოდნენ. ძალიან რომ
დაიღალნენ, შეჩერდნენ. ძალღმა ისკუპა და სიმინდის ყა-
ნაში შეიმაღა.

როცა ძალღმა გვერდზე ჩამირბინა, ჩემი დამბაჩა მხო-
ლოდ მაშინ მომაგონდა. ვიფიქრე, ეჰ, რა კარგი იქნებოდა,
ეს ქოფაკი მომეკლა, სოფელში შემოსვლისთანავე მამაცი
სახელს მოვიხვეჭდი-მეთქი. მაგრამ ახლა რაღა დროს ამა-
ზე ფიქრი იყო. მათრახი ერთხელ კიდევე გადაფუჭირე ცხენს,
შევახურე და, ჰერი, დავაოთხე იქითკენ, საითაც რაშიდის
კარ-მიდამო მიმასწავლეს.

გადავჭერი ღელე, შევუყევი ღორღიან ბილიკს, მერე
გავივაკე და უკვე მინიშნებულ ადგილზე ვიყავი. მივადექი
სახლ-კარს, მაგრამ რა სახლ-კარს! უკეთესს თვალი ვერ-



სად ნახავს ქვეყნიერების ზურგზე. ვეებერთელა სახლიდან წინ იმხელა ეზო იყო გადაჭიმული, მარულას გამართვად კაცი. ისეთი ხასხასა ბალახი ბიბინებდა, ლოგინს დათმობდი და ბალახზე დაწვებოდი. სახლიდან ოციოდე საყენზე იდგა ადამისდროინდელი კაკალი. ზოგს სახლი არა აქვს ისეთი კარგი, იმ ეზოს რომ ჭიშკარი ჰქონდა. ეზოში მოჩანდა: ბოსელი, საჯინიბო, ბელელი, ნალია და ფარდული.

„ეტყობა, მდიდარი კაცია რაშიდი. მე რომ მაგის სიძე გავხდე, ჩემს ბედს ძალლი არ დაჰყევს“, — გავიფიქრე მაშინვე.

დაოთხილი ცხენი ჭიშკართან დავიოკე, აღვირს მოვწიე და ყალუზე შევაყენე, მერე სახლისაკენ გავიხედე.

ორი ქალიშვილი აივანზე იდგა, ორიც სწორედ მაშინ ზოსტნიდან გამოვიდა. სილამაზეში ერთმანეთს ეჯიბრებოდნენ, მზეთუნახავეებსა ჰგავდნენ. გამიკვირდა, ამ ველურ მთებსა და კლდეებში ასე ლამაზი ყვავილები როგორ გაიზარდა-მეთქი?!

დიდხანს აღარ დამიყოვნებია, ჭიშკრის ურდული გავწიე, ცხენმა თავისი ჩვეულებისამებრ ქვიქვირით შეალო იგი და ეზოში შევედით. ამ დროს სახლის კიბის ქვეშიდან უშველებელი წითელი ძალლი გამობოზდა. დამინახა და ყუფით გამოიქცა.

ბოსტნიდან მომავალმა ერთ-ერთმა ქალიშვილმა ალბათ შორიდან მომკრა თვალი და ჭიშკრის გასაღებად წამოვიდა. მაგრამ დავასწარი ეზოში შესვლა. ერთი კიდევ შევათამაშე რაში და იმ ქალიშვილის წინ შევაჩერე. ცხენმა მაშინვე ფეხი დაასვა მიწას და ქანდაკებას დაემგვანა.

ქალიშვილმა ისე ალერსიანად მომანათა თვალები,



მისმა ეშხმა კინალამ ცხენიდან გადმომავდო. ეგრძნობდა
სამი დანარჩენი ქალიშვილიც მე მომჩერებოდა. ეს მინდო-
და მეც, ვხარობდი ამით, მაგრამ როდი ვიმჩნევდი, აივნი-
საკენ ერთხელაც არ გამიხედავს, წინ დამდგარ ხატებას
ვუცქეროდი. ყუფით გამოქცეულმა ძაღლმა ღრენა-ღრენით
ჩემს ცხენს შემოურბინა.

— ტრიზონ, ახლავე გაბრუნდი უკან! — შეუტია პატ-
რონმა და ძირს დაიხარა თითქოს ქვის აღება უნდაო. ძაღ-
ლი მაშინვე ჯანზე გახტა. კუდი ააქიცინა, თვალეზი ააფა-
ხულა, თავი დამნაშავესავით ჩაჰკიდა და კიბის ქვეშ თა-
ვის სადგომში შეიძურწა.

— სალამი თქვენდა! — თავი დაუეკარი ქალიშვილს და
აღვირი თავისუფლად მივუშვი.

— ალაჰმა სალამი და სიკეთე ნუ მოგიშალოს! — მი-
პასუხა მან.

მეორე ქალიშვილიც მოვიდა. მივესალმეთ ერთმანეთს.
გულმა მიგრძნო, რომ ზიზა სწორედ ეს ქალიშვილი იყო.

— სტუმარი ღვთისაა, — მითხრა ზიზამ. — ჩამობრ-
ძანდით. იმეღია, ცუდად არ გიმასპინძლებთ.

მომიახლოვდა და ის იყო, უზანგი უნდა დაეჭირა, მაგ-
რამ დავასწარი და უმაღვე მიწაზე გავჩნდი. გაუკვირდა,
აღბათ გაიფიქრა, ასე მალე ცხენიდან როგორ ჩამოხტაო.
მერე აღვირს ეცა. ცხენი გვერდზე წაიყვანა და საგანგებოდ
ცხენების მისაბმელთან გააჩერა.

ამასობაში აივანზე მყოფი ქალიშვილებიც ჩამომეგებ-
ნენ და დიდი სახლის კიბეზე ამიძღვნენ.

— მობრძანდით, მობრძანდით. ჩვენი სახლის კარი



სტუმრებისათვის მუდამ ღიაა. მიბრძანდით, — მილიმოდო
ერთი, რომელიც ყველაზე უფროსი ჩანდა.

მან მოინდომა, აივანზე პირველს მე შემედგა ფეხი, მაგრამ არც ისეთი უვიცი ვიყავი, ასე მოვქცეულიყავი.

— რას ბრძანებთ! ალაჰმა მასპინძლობა ნუ მოგიშალოთ და, როგორც წესია, შინ ჯერ მასპინძელი უნდა შევიდეს, მერე სტუმარი. მიბრძანდით, მიბრძანდით, — მივუგე წამსვე.

— თუ შინ სტუმარი შევა პირველი, არც ამით დაირღვევა ჩვენი წესი. მასპინძელმა ყოველთვის უნდა სცეს პატივი სტუმარს. თქვენ მიბრძანდით პირველი.

ერთ ხანს ასე ვეპატიჟებოდით ერთიმეორეს, ბოლოს ჩემმა სიტყვამ გასჭრა, მასპინძლები წინ გაუშვი და მე უკან მიფევეი.

აივანზე ასვლისთანავე ერთმა მათრახი გამომართვა და შინ შეიტანა, მეორემ სკამები გამოიტანა და იქ დადგა, სადაც ჩრდილი ეფინა.

— დაბრძანდით, — შემეპატიჟა ისევ უფროსი და, აილო სკამი და მოაჯირთან გადადგა.

ყველანი ჩამოვსხედით.

მამაკაცები შინ არ იყვნენ. კვირადღეობით აქაურ მამაკაცებს შინ რა გააჩერებდათ! რაშიდს თავისი ავლადიდება სამი ქალიშვილისათვის დაეტოვებინა. მეოთხე ქალიშვილი მისი ბიძაშვილი იყო, ნაზი.

ქალიშვილთა შორის პირველი უხერხულად გვრძნობდი თავს, მაგრამ მათმა ტკბილმა საუბარმა მალე გამათამამა და მეც ჩემებურად ამოვიდგი ენა. კარგად მოგეხსენებათ, სიტყვა მიჭრის და წყლიანი ხეობაზე მემარჯვება,

მაგრამ ამ მხრივ არც ის მთიელი ქალიშვილები ჩამომრჩეობდნენ. სიტყვით ისეთი ფარიკაობა გამიმართეს, კინაღამ დამამარცხეს. განსაკუთრებით რაშიდის საშუალო ქალიშვილი ზიზა მახვილსიტყვაობდა, სულ ხანჯალივით ორლესულ სიტყვებს მესროდა. ვფიქრობდი, ამ დალოცვილმა გველის სიბრძნე ხომ არსად შეითვისა-მეთქი. ზიზას ნაზიც ეშველებოდა ხოლმე და სამიოდეჯერ უკანაც დამახევენეს, მაგრამ მერე ერთბაშად ავენთე, სული მოვითქვი და ისე გავბასრდი, კინაღამ ჩხუბი ატყდა.

რაკი წელში გავსწორდი, გიყვარდეს, მე იმათ დღე დავაყენე.

სიტყვით ფარიკაობა რომ მოგვწყინდა, ჩვენ-ჩვენი ამბების მოყოლა დავიწყეთ. უთუოდ გახსოვთ, რუსეთ-იაპონიის ომის დროს აფხაზები ჯარში არ მიჰყავდათ. რუსთა მეფე არ გვენდობოდა. მაგრამ მე და ჩვენს ოჯახში აღზრდილმა ბიჭმა, სალიბეიმ, მოვილაპარაკეთ და ჯარისკაცის აბგები ძალით ავიკიდეთ. ქუთაისში რომ ჩაგვიყვანეს, სალიბეის ჯარის წესები არ მოეწონა და შინ გაიქცა. მე რვა თვეს მჯიჯგენეს და მაწვალეს, მაგრამ იმის გამო, რომ რუსული არ ვიცოდი თუ ჯარისკაცის გული არ მქობდა, ვერაფერი შემასწავლეს. რაკი დარწმუნდნენ, ამისგან მეოპარი არ გამოვაო, თბილისის მახლობლად გადამიყვანეს, მომცეს ხელში ბარი და წერაქვი და მითხრეს, რაკი სხვა რამე არ შეგიძლია, აგერ გზაა გასაკეთებელი და მიწა თხარეო. ვაი, შენს მაქითათის! ამას ველოდი!

ერთ-ორ დღეს კი ვუბლაცუნე წერაქვი, მერე დავკარი ფეხი და გამოვიპარე. იმ ქალიშვილებთან ჩემი ჯარში წასვლის ამბავი მოვყევი, მარა ის კი არ მითქვამს, ჯარის-



კაცად არ გამოვდექი-მეთქი, პირიქით, იაპონიის მთავარმა მწიგნობარმა კაცად გავასაღე თავი, შევთხზე ათასი გმირული საქმე, რომელთა მონაწილეც ვითომ მე ვიყავი. ისიც კი ვთქვი: შინ რომ დავბრუნდი, თავადები ყოველდღე სუფრას მიშლიდნენ, როგორც სახელგანთქმულ აფხაზს, და მთხოვდნენ, მათთვის ჩუბინი სროლა მესწავლებინა. ეს რომ დამიჯერეს, ბოლოს ასეთი რამეც დაფუძნებულა: ყაჩაღებმა კაცი მომიგზავნეს, წამო ჩვენთან და გვიბელადე, სხვა შენგან არაფერი არ გვინდაო, მაგრამ ასეთ ბინძურ საქმეზე როგორ დავეთანხმებოდით-მეთქი. მართალი და ტყუილი სულ ერთმანეთში ავურიე. ისეთი კორიანტელი დავაყენე. პირდაღებულნი მომჩერებოდნენ, ეს ვინ ყოფილაო.

მაგრამ ყველაზე უფრო მაშინ გავაკვირე, როცა დათვის მოკვლის ამბავი ვუამბე.

— ჩემს სიცოცხლეში არ გამიგონია, რომ შენ დათვი მოგეკლას, — შეედავა მაქითათის მის გვერდში მჯდომი მოხუცი კალაში, რომელიც პირგაცვეთილი დანით ჯოხსათლიდა.

— შეიძლება მეც არ გამიგონია, მაგრამ მთავარი ისაა, რომ ეს ამბავი მათ მოგუყევი, თანაც ისე, გაცოცხლავან პირი დააღეს. ჩემი ენაწყლიანობით მოხიბლულები თავს მაწონებდნენ, ერთმანეთს კი უბღვერდნენ. რადგან თითოეულ მათგანს მეორე თავის მეტოქედ მიაჩნდა. რაკი ეს ვიგრძენი, ჩემი გმირობის ამბავი გავაბუქე და გავაბუქე.

— აბა, ერთი ჩვენც მოგვიყევი, შენს გამოგონილ დათვზე როგორ ინადირე, — სთხოვეს მოხუცებმა, რა ენაღვლებოდათ, მაქითათის ენა არ ეღლებოდა და მათ ყურე-

ბი. ჯერჯერობით საქმეც არაფერი ჰქონდათ. სტუმრებზე
არსად ჩანდნენ.

— ეჰ, მას შემდეგ ბევრმა წყალმა ჩაიარა და კარგად
ალარც მახსოვს როგორ მოყვები დათვის მოკვლის ამბავი.
მაშინ უფრო ენაწყლიანი გახლდით. ტყუილსაც რიგიანად
და დამაჯერებლად ვყვებოდი, ახლა კი ასეთი რამეების გა-
მოგონება სადღა შემიძლია! ცხოვრების დაღმართს დავა-
დექი უკვე. — თავი მოისაწყლა მაქითათიმ, მაგრამ მო-
ხუცებმა კვლავ აიძულეს იგი, თხრობა განეგრძო.

— კარგი, იყოს ნება თქვენი. როგორც შევძლებ, ისე
გიაზნობთ. ოღონდ არ დამძრახოთ. მაშინ ქალები მისმენ-
დნენ და ნადირობისა რა გაეგებოდათ... ჰოდა, ერთხელ
ავიყოლიე სამი ამხანაგი და ტყიან მთაზე სანადიროდ წა-
ვედი. ერთი უკან დაბრუნდა, ხოლო სამნი სამი დღე
უღრანებში ვნადირობდით. მრავლად დავხოცეთ გარეული
დორი, ტურა, მგელი და ფოცხვერი. ირმებსაც დავაყრვეი-
ნეთ ბორჩხალა რქები. მეოთხე დღეს ნანადირევის ნაწი-
ლი მწყემსებთან დავტოვეთ, ხოლო რასაც მოვერიეთ, ავი-
კიდეთ და სოფლისაკენ დავეშვით. აფხაზეთში ერთი მთა
არის, სამყაროს მფლობელის სახელი ჰქვია. ამ მთის ძირას,
ხეობაში რომ ჩავედით და წყაროსთან დავისვენეთ. უკვე
სამხრობის დრო იყო.

მე მინდოდა მალე წავსულიყავით იქიდან, მაგრამ ერ-
თი ამხანაგი შემედავა:

— შენ. ძმაო, მაგარი მუხლი და ჯან-ღონე გაქვს. ქვეყ-
ნის კიდემდე რომ იარო, არ დაიღლები. აბა, ერთი ჩვენცა
გგვითხე, ფეხებს ძლივსლა დავათრევთ. დავისვენოთ რიგი-
ანად, მუხლიდან ქარი ამოეშვებათ, ღვთის მოცემული წყა-

ლი აქვე გვაქვს, გული გავიგრილოთ და მერე დავაგვიტყუოთ.
გზას. სოფელში სალამოზე მაინც ჩაველთო.

მან ნადირის ტყავები წყაროსთან მიყარა, მუჯირა მი-
აგდო, თოფი კლდეზე მიაყუდა, მოღზე გაიშოტა და ხე-
ლები თავქვეშ მუთაქასავით ამოიდო.

შევხედე და არ მესიამოვნა მისი დაძაბუნება. მონადი-
რე ასე მალე არ უნდა იღლებოდეს. მეორეს შევხედე და
ისიც მოღვენთილიყო. სიმართლე რომ ვთქვა, ეს საცოდავი
მონადირენი შემებრალნენ.

— კარგი, დაისვენეთ, რაკი მეტი არ შეგიძლიათ, —
ჩაველაპარაკე ჩემთვის, ტვირთი მიწაზე დავაგდე, თოფი
ხეზე მივაყუდე და მეც მივწიქი.

როგორც მახსოვს, ძალიან ლამაზი ადგილი იყო. რძე-
სავით აქაფებული მდინარე მალალ კბოდეთა შორის თავა-
წყვეტილი მოშხუოდა და ტალღებით რიყის ქვებს პირს
ულესავდა. კბოდეთა იქით მთის ლამაზი ფერდობი მოჩან-
და. ზღაპრულ ხალიჩას ჰგავდა ის ადგილი. მარჯვნივ ათას-
წლოვანი ფიჭვების უღრანი ტყე მოჩანდა. ისეთი ჩრდილი
ეფინა მათ ქვეშ, კაცი რომ ტყეში წესულიყო, იფიქრებდა
აქ მარადიული ღამეაო. მარცხნივ საძოვრები ფირუზისა
და ზურმუხტისფრად ბრწყინავდნენ. ცხვრის ფარები
ღრუბლებივით შეფენოდნენ ფერდობებს; სადღაც სალამურ-
ი კენესოდა, სადღაც მწყემსის ძალლი ყეფდა.

მე მარტო ადამიანის კი არა, ბუნების სილამაზეც მიყ-
ვარს. იმ მთების ცქერით გატაცებულს საკუთარი თავიც
დამავიწყდა. უცებ თოფის ქუხილმა გამომათხიზლა.

— გზა გადაუშერით, გზა, თორემ გაიქცევა! — ყვი-
როდა ვიღაც.



ცოტა ხნის შემდეგ ისევ იქუხა თოფმა.

ვხედავ, იმ ადგილზე, საიდანაც ყვირილი მომესმა, კვამლის ღრუბელი ავარდა. ძაღლებიც იქით გაიჭრნენ. უცებ წყაროს მახლობლად უცნაური ლაწალაუწი გაისმა. ახლა აქეთ მოვიხედე და ოი, საკვირველებავ! ვეებერთელა დათვის საბრალო კრავი პირით უჭირავს და ისეთი ბდღვინვით გამორბის, ლეწავს ყველაფერს. უცებ დათვმა მხარი იცვალა და ჩემკენ განოეშურა.

ქალიშვილებთან ამას რომ ვყვებოდი, — ჩაურთო მატითათიმ, — კაკუანი დამბაჩა ვიძვრე და ისევ ქამარში გავიჩარე, თავი მოვიწონე, შემომხედეთ, რა იარაღის პატრონი ვარ-მეთქი, თითქოს დამბაჩას აქამდე ვერ ამჩნევდნენ.

ჰოდა, ისევ გავაგრძელე თხრობა.

— ვისაც დაჭრილი! დათვი არ უნახავს, ძნელად წარმოიდგენს იმ დღეს, რაც გადამხდა. წამოვიდა დათვი ჩემკენ, მარა რა წამოვიდა! თვალები მუგუზულებივით აენთო, ხახა დააღო და ღრიალი მეცხრე ცამდე ააწვდინა... დათვი რაღაც საშინელებას ჰგავდა, მაგრამ დღემდე ვფიქრობ და ვერ მომიგონებია, რას!

მხდალი ადამიანი სიკვდილს რომ თვალეში შეხედავს, მაშინვე წახდება, თავს ბედისწერას მიანდობს, რაც მომივა, მომივაო. გულადი ადამიანი კი, პირიქით, მაშინ უფრო გამამაცდება და სიკვდილს პირისპირ შეებმება, თუნდაც ცარიელი ხელებით. მეც იმ დათვის დანახვისას გამარჯვების იმედი არ დავკარგე, მთელი ჭკუა და ძალა მოვიკრიბე, გავმაგრდი და ისე დავუხვდი. რომ დავბნეულიყავი, ლუკმა-ლუკმა დამგლეჯდა. მაშინდელი თოფი ახლანდელს კი არა ჰგავდა, მის სავაზნეში ხუთი ვაზნა კი არ ჩადიოდა.

ლულიდან ვტენიდით შიგ თოფისწამალსა და ვტენიდით ზუმბით. ერთხელ რომ ისროდი, ნახევარი საათი მინც უნდოდა, მეორედ რომ გაგეტენა. ერთი კი ვესროლე დათვს, ეგ იყო და ეგ! დაქრილი დათვი მე ხომ არ მომიცდიდა: აბა, მეორედ გატენე, მე აგერ დავდგები და მესროლეო. ისე ბღღვინავდა, ქვეყანას გადაბრუნებით ემუქრებოდა და მე დამინდობდა? ერთ საყენზე რომ მომიახლოვდა, უკანა თათებზე დადგა, რათა უფრო მოხერხებულად მცემოდა და ჩემ შესაშინებლად ერთი კიდევ დაიღრიალა.

ამას რომ ვყვებოდი, მახსოვს, ქალიშვილებს გადავხედე, აბა ჩემი ნაამბობი რა შთაბეჭდილებას ახდენს-მეთქი. ქალიშვილები სუნთქვაშეკრულნი მისმენდნენ; მოუთმენლად ელოდნენ, კაცისა და მხეცის ჭიდილი რითი დამთავრდებოდა. ეს რომ შევატყვე, ჩვენი ბრძოლის ამბავი უფრო გავაზვიადე. სიტყვებში მეტი ცეცხლი დავანთე, ხმა განგებ ავაკანკალე, ვითომდა ახლაც რომ მაგონდება ის დღე, სიმშვიდე მერღვევა-მეთქი.

ჰოდა, გადმოხტა თუ არა დათვი ჩემკენ, უმალვე გვერდზე ვისკუპე. დათვმა ვერ მოზომა თავისი ნახტომი, ვარაუდმა უმტყუნა, დაეცა და ფერდობზე დაგორდა. მაგრამ უმალვე წამოხტა და კვლავ ჩემკენ წამოვიდა. უცებ მოვისაზრე, რომ ხერხით ველარ მოვატყუებდი. მეტი რა გზა იყო, ერთმანეთს პირისპირ უნდა შევებოდით.

მორთან გავჩნდი და ცარიელ თოფს ხელი დავავლე. დათვს მოახლოვებისთანავე თოფი და ჩემი მკლავი ერთად ჩავჩარე პირში. ახლა ყბების არც მოკუმვა შეეძლო და არც გაშლა. გაჯმაჯურდა, დაიწყო თავის ქნევა, მაგრამ ვერ შემისუსტა მკლავი. უცებ თათი მომიქნია და წამაქ-

ცი. წამაქცია და მომინდომა გათელვა, მაგრამ ვერც ახლა დამაზნია შიშმა. ცალი ხელით ქარქაშიდან ბასრი ხანჯალი ამოვაძვრე და მუსცელში დავუტრიალე მხეცს. ერთი კიდეგ გაიბრძოლა საწყალმა, წელები გადმოყარა, უკანასკნელად ჩაიბურღლუნა და ფერდობში დაგორდა. სხვათა შორის, ვაკეზე რომ გაჩერდა, ერთი კიდეგ გამოიხედა და თათები ისე გამომიშვირა, თითქოს მათხოვარი მოწყალებას მთხოვდა. შემეცოდა, მაგრამ რომ არ მომეკლა, მაშინ ხომ მე ჩავვარდებოდი მის დღეში?

— მსაუთა აჩბას სასახლის იატაკზე, აი, იმ დათვის ტყავია გაფენილი, — დავუმატე ბოლოს, ჩემს მონათხრობს უფრო დამაჯერებელს გავხდი-მეთქი.

— ის დათვი ხომ შენმა ბიძაშვილმა იაქუფმა მოკლა? სხვისი სახელი რატომ მოიპარე? — შენიშნა მაპთიმ.

— მე არავის სახელი არ მომიპარავს, სხვისი ამბავი ჩემად გავასაღე, ეგ იყო და ეგ. იმას ხომ არ ვამბობ, ის დათვი ნამდვილად მე მოგკალი-მეთქი? — თავი იმართლა მთხრობელმა. — ასეთი ამბავი ხომ შეიძლება მეც გადამხდენოდა? შეიძლება. მაშასადამე, მოყოლის უფლებაც მქონდა, მაგრამ ჯანდაბას ის დათვი, მე გიამბობთ, რაც შემდეგ მოხდა. თხრობა რომ დავამთავრე, ყველამ ისე შემომხედა, თითქოს მათ წინაშე უბრალო კაცი კი არა, დევი იდგა.

ერთი სიტყვით, იმ ნადირობის ამბის მოყოლით ყველას გული ერთად მოვინადირე. მეტი რაღა მინდოდა. ვხარობდი, საქმე უკვე გაჩარხული მეგონა, მაგრამ როცა კაცს ბედი არა გაქვს, ძალლიც შენ გადაგემტერება და კაციც.

ჩემს მსმენელებს ჯერ კიდეგ გაკვირვება ეხატათ სახე-

ზე, როცა რაშიდის კარ-მიდამოს მახლობლად უჩვეულო ხმაური ატყდა.

— რა იყო, რა მოხდა? — შეშფოთდნენ ქალიშვილები და ჭიშკრისკენ გაიქცნენ.

მეც, ჩემდა საუბედუროდ, ცნობისმოყვარე ვარ, ვიფიქრე, გავიგებ, რა ამბავია-მეთქი და მასპინძლებს ავედევნე უკან.

— ჭიშკარი ჩარაზეთ, ცოფიანი ძაღლი მორბის, არ შეუშვათ ეზოში, არ შეუშვათ! — იძახდა ერთი ხელჯოხიანი კაცი.

ვხედავ, ვილაც კაცი ლობეზე გადმოხტა და ჩვენკენ გამოეშურა. უკან ის ძაღლი მოსდევს, ამ სოფელში შემოსვლისას რომ დავლანდე. მორბის ძაღლი და ხელჯოხიანი კაცი ყველაფერს ესვრის, რაც კი ხელთ მოხვდება.

სიმართლე გითხრათ, მას შემდეგ ძალიან დიდი დრო გავიდა, მაგრამ იმ ოხერტიალ ძაღლს ახლაც ვერ ვიციწყებ, სულ თვალწინ მიდგას.

— ალბათ ძალიან დაგაფრთხო და იმიტომ, — ჩაიციენეს მოხუცებმა.

— გარდასული ამბავია, დასაფიცი რა არის, დამაფრთხო და მეტიც მიქნა, — განაგრძო მაქითათიმ, — კუპრივით შავი იყო, ბანჯგვლიანი. ხარისტოლა იქნებოდა, დრუნჩი დაელრიჯა, ენა გადმოეგდო, თვალეზი გადმოეკარკლა.

ერთ ხანს რაშიდის ეზოზე შემოვლებული მაღალი ლობის გასწვრივ ირბინა, მერე ზედ გადმოეგლო და ეზოში დაიწყო წრიალი. იმაზე საშინელი ქვეყანაზე არაფერი დამინახავს, არც სიზმრად მომლანდებია, არც ვინმესგან გა-



მიგონია. აი, ახლაც რომ მაგონდება, ასე მგონია, ზურგს
ქიანჭველები დამესიენ-მეთქი.

— ცოფიანი ძაღლი, ცოფიანი ძაღლი! გვიშველეთ! —
აწიქდნენ რაშიდის ქალიშვილები. უფროსი გაიქცა და
სახლში შეიმალა. ორი დანარჩენი ერთმანეთს მიეკრა. ნა-
ზი უფრო მამაცი გამოდგა, არ დაიბნა, მაშინვე მე გადმომ-
ხედა და დამიყვირა:

— ზეი, ვაჟაკო, რას უყურებ! ტყუილა ხომ არ დაათ-
რევ მაგ დამბაჩას, ესროლე მალე, ესროლე!

ნაზის ხმა კი გავიგონე, მაგრამ ვაი იმ ვაგონებას. აღ-
ბათ მიწის ფერი მედო სახეზე. შეშინებულს გული ამო-
ვარდნაზე მქონდა. სხვისთვის როგორ უნდა მეშველა, რო-
ცა თვითონ რაშიდის ქალიშვილებს ვეფარებოდი და ვცახ-
ცახებდი!

— ესროლე, ესროლე, რაღას უყურებ, შე ოჩანო! —
კვლავ მიყვიროდა ნაზი. ლამის თვითონ გამომტაცა იარა-
ღი.

ეპ, რაც იქნება, იქნება-მეთქი, გავიფიქრე და ვიძვრე
კაჟიანი დამბაჩა. ლულა ცოფიან ძაღლს მივუშვირე.
დავხუჭე თვალები და ჩახმახი ცერით ფეხზე შევაყენე.

— გამოჰკარი სასხლეტს ხელი, გამოჰკარი! — ჩამკი-
ვის ყურში ნაზი.

გავახილე თვალი და რას ვხედავ, ცოფიანი ძაღლი ათი-
ოდე ნაბიჯითლა ჩემგან დაშორებული. ზიზას საღღაც
გრძელი ჯოხი უშოვია, წივის და თან ამ ჯოხს იქნევს, რომ
ძაღლი ახლოს არ მიუშვას თავის დასთან.

— გაიწიეთ იქით, გაიწიეთ! — დავიყვირე განწირუ-
ლის ხმით, მინდოდა კი ამაყად დამეყვირა. დამბაჩიანი ხე-



ლი ძალისაჲკენ გავიშვირე, თავი გვერდზე მივაბრუნე. თვალები კვლავ დავხუჭე და სასხლეტს სალოკი თითი გამოვკარი. ეს იყო და ეს. დამბაჩამ ერთი კი ჩაახველა „ჩახო“ და გამივარდა ხელიდან. ირგვლივ ისეთი კვამლი დადგა, თვალი რომ გავახილე, ვერაფერი დავინახე. გული მომეცა, შვებით ამოვისუნთქე. მოლზე დაგდებული დამბაჩის აღება მოვინდომე, დავწვდი და იმისთანა თქვენს მტერს, მე რომ საქმე დამემართა. იმ ოხერტიალმა, ზებერი კაცივით ხველა და ბათქაბუთქი სწორედ მაშინ ატეხა. მაშინვე გადავაგდე.

საქმე ის იყო, რომ ეს დამბაჩა ხელით იტენებოდა. წინა დღეებში, როცა შიგ თოფისწამალს ვყრიდი, შევნიშნე, რომ ლულა ძალიან გაცვეთილი და გათხელებული ჰქონდა. ჩახმახის ერთი დაცემინების შემდეგ ლულის ახლო ნაწილი უმალვე ცხელდებოდა და თოფის წამალი ნაწილ-ნაწილ ფეთქდებოდა.

— დამბაჩა სკდება, უფრთხილდით, უფრთხილდით! დაწეით, დაწეით ჩქარა! — ვიყვირე კი არა, ვიღრიალე და გავიქეცი. მინდოდა ჭას ამოვფარებოდი და მივუახლოვდი თუ არა, ძირს გავიშოტე. თურმე იმ ადგილზე ბატები-სათვის წყალს ასხამდნენ. პატარა ორმოში გუბე იდგა. სწორედ იმ გუბეში ჩავწოლილვარ. დავსველდი და ამოვითათხე. წიწილასავით გაწუწული და გასაცოდავებული რომ დამინახეს რაშიდის ქალიშვილებმა, ეზოში მარტო მიმატოვეს და გაიქცნენ. როგორც იქნა წამოვდექი, მაგრამ ვაი იმ წამოდგომას. მეგონა, აი, აგერ მომხვდება ტყვია და აი აგერ-მეთქი. მადლობა ალაჰს, გადავრჩი!

ხელები ბალახზე შევიწმინდე, ჩოხა-ახალუხი დავიფერ-

თხე, ჩემი შემარცხვენელი დამბაჩა ავიღე, კვლავ ქამარში გავიჩარე და აივანზე ფრთხილად ავედი. თან აქეთ-იქით ვიხედებოდი, ველოდი, ვინმე წყალსა და საპონს გამომიტანს, ხელ-პირს დამაბანინებს-მეთქი. არ მოგეცეს გასაჭირი, არავინ გამომხედა.

ცოტა ხანს აივანზე ბოლთას ვცემდი, მერე ჩამოვჯექი, ზოლოს მოთმინება დავკარგე და კარზე დავაკაკუნე.

— რა გინდა, გმირთა გმირო? — გამომძახა ზიზამ დამცინავად.

ენა ვერ დავძარი, რა უნდა მეპასუხა?

უცებ კარი ღრიჭოდ გაიღო და უმაღვე დაიხურა, ჩემ წინ, ფეხებთან რალაცამ ბრახანი მოადინა. დავიხედე, ჩემი მათრახი იყო. ვილაცამ გადმომიგდო.

აი, ეს იყო იმათი საბოლოო პასუხი. გულჩამწყდარმა ავიღე მათრახი, ბანდალ-ბანდალით ჩამოვედი, ცხენთან მივედი, მოსართავეები მოვუჭირე, მოვახტი და უკანასკნელად შევხედე იმ მდიდარი სახლის აივანს. მხოლოდ შავი კატა იჯდა მოაჯირზე და პირს ილოკავდა. ეს იყო და ეს.

კაცს, როცა ბედი არა გაქვს, კატაც არაფრად ჩაგადებებს, ასეა, ძმაო, ასე.

— მშვიდობით! — მივაძახე ფისუნიას და ცხენი ჭიმკრისკენ შემოვაბრუნე.

კატამ ირიბად გამომხედა, თვალეები ააფახულა და უღვაშეები აათამაშა.

რაშიდის კარ-მიდამოს ასიოდე საყენით რომ გამოვცილდი, გულმა არ მომითმინა და ერთხელ კიდევ გავიხედე. უზანგებზე შემდგარმა ოთხივე ქალიშვილს მოგვარის თვა-



ლი. აივანზე იდგნენ, ჩემკენ იხედებოდნენ და იცინოდნენ. არა, მათი სიცილის ხმა არ გამიგონია, ვიგრძენი.

„ეჰ, რატომ არ დაიქცა ეს დღე?“ — ვინატრე მაშინ, მაგრამ წამხდარ საქმეს რაღას ვუშველიდი. რაც მოსახდენი იყო, მოხდა, მორჩა და გათავდა.

იმ დღის შემდეგ ჩემს სახლსა და სოფელში ჩავიკეტე. აღარსად დავდიოდი, საცოლე აღარ მიძებნია, კიკოსავით ამიტომაც დავრჩი.

მაქითათიმ სიტყვა დაამთავრა და თავი ჩაქინდრა.

— ეჰ, ჩემო მეზობელო, შენ მაგ ამბებს ხუმრობით ყვები, მაგრამ კაცი რომ დაუკვირდეს, სატირალია. საცოდავი ხარ, საცოდავი, — უთხრა თავჩაქინდრულ კაცს მოხუცმა ზურაბმა.

ყველა რაღაცამ დააფიქრა. ისეთი სიჩუმე ჩამოდგა, ფხიზელი ყურის პატრონი იმასაც გაიგონებდა, ხის ჭია ბერი ცაცხვის ქერქს რომ ღრღნიდა.

ეს სიჩუმე მალე მანქანის გუგუნმა დაარღვია.

— მოდიან, მოდიან! — დაიძახეს ვიღაცეებმა და შეკრებილი ხალხი ახმაურდა.

მაქითათიმ თავი აიღო და გორაკზე ამომავალი მსუბუქი მანქანა დაინახა. მოგუგუნებდა იგი და მტვრის კუდს ტოვებდა.

მანქანა სასოფლო საბჭოს შენობის წინ გაჩერდა. ხალხი სტუმრებს მიეგება. მანქანიდან ორი კაცი და ერთი ქალი გადმოვიდა.

— გამარჯობათ, გამარჯობათ! — გაისმოდა ყოველი მხრიდან.

— სალამი!

— იცოცხლეთ, გაიხარეთ!

ტანმალალი ქალი გულითადი ღიმილით ესალმებოდა ყველას და მოწიწებით უკრავდა თავს. მაქითათიმ შეხედა, თითქოს ეცნო, მაგრამ ვერ გაიხსენა უცებ, სად და როდის ენახა იგი.

სტუმრები თავმჯდომარესთან შევიდნენ. ხალხი უკვე მოგროვილიყო და კრების დაწყება გადაწყვიტეს.

რაკი სიცხე ყველაფერს წვაავდა, მოილაპარაკეს, მაგიდა ცაცხვის ქვეშ დავდგათ და ხალხსაც იქვე შევუყაროთ თავიო. ცოტა ხნის შემდეგ ყველა იქ მოგროვდა.

კრება სოფლის საბჭოს თავმჯდომარემ გახსნა.

ღღის წესრიგში იდგა ერთი საკითხი: სოფელ აჩირხაში საკოლმეურნეო არტელის ჩამოყალიბება.

ამ საკითხზე რაიონული საბჭოს აღმასრულებელი კომიტეტის თავმჯდომარემ ილაპარაკა.

თავისი სიტყვის დასასრულს მან აღნიშნა, რომ ხალხი იწყებს კოლექტიურ შრომას. ეს არის ახალი ცხოვრების დასაწყისი, ისეთი ცხოვრების, რომელზეც ჩვენი მამა-პაპანი მთელი სიცოცხლე ოცნებობდნენ. თქვენთვის ჯერჯერობით, ალბათ, მრავალი რამ გაურკვეველია. თუ როგორ უნდა ჩამოყალიბდეს საკოლმეურნეო არტელი, ამის თაობაზე სოხუმიდან ჩამოსული ამხანაგი გელაპარაკებათ.

მან გვერდით მდგომ ტანმალალ ქალზე მიათითა.

— ილაპარაკოს, ილაპარაკოს, — დაიძახა ხალხმა.

მთელი ამ ხნის განმავლობაში მაქითათი იმას ფიქრობდა, ეს ლამაზი ქალი ნეტავ სად მინახავსო.

„სიბერე რომ მომეძალა, ალბათ მახსოვრობამ მიმტყუნა და ეს იმის ბრალიაო“, — დაასკვნა მან ბოლოს.



— სიტყვა ეძლევა სახელგანთქმულ აგრონომს ტყუან-
ბა გუბანაშს, — გამოაცხადა თავმჯდომარემ.

ხალხმა ტაში დაუკრა.

მხოლოდ მაქითათის გაუხევედა ხელები. გაკვირვებისა-
გან პირი დაალო და კარგა ხანს ასევე პირღია დარჩა.

რაც საკუთარი ყურებით გაიგონა, არა სჯეროდა, მაგ-
რამ მისდა სავალალოდ, ეს სიმართლე იყო.

ქ ა მ ხ უ ხ ი

(ზ ლ ა პ ა რ ი)

იყო ერთი მონადირე. სახელად ირმის შვილი ჯამხუხი ერქვა. იგი ძალზე ღონიერი და მოხერხებული ჭაბუკი იყო. ქვეყნის რომელ კუთხეში გინდათ—აღმოსავლეთით, დასავლეთით, ჩრდილოეთით თუ სამხრეთით, ყველგან გაიგონებდით მის ქება-დიდებას. დიდი და პატარა, მოხუცი და ახალგაზრდა მის საგმირო საქმეებს ყვებოდა. ისეთი ლამაზი და მოხდენილი იყო, ხალხი ნატრობდა, ნეტავ ჯამხუხის მსგავსი ვაჟი გაგვიჩნდესო.

როგორც ვთქვით, ირმის შვილს ნადირობა უყვარდა. ზოგჯერ ნადირობაში ისე გაერთობოდა, შინ ორ-სამ თვეს არ ბრუნდებოდა.

ერთხელ ირმის შვილი ჯამხუხი ლამაზად გამოეწყო სანადირო ტანსაცმელში, შემოიკრიბა ამხანაგები და შორეულ მთებში გაემგზავრა.

შორი გზა გაიარეს. ხიფათიც ბევრი გადახდათ, მაგრამ არაფერს უშინდებოდნენ. სამაგიეროდ, ნადირობის თვის წყალობით მრავალზე მრავალი ნადირი დახოცეს. დილის ნანადირევს გაიყოფდნენ თუ არა, ხეზე ჩამოჰკიდებდნენ. წინასწარ ნატყვიარ ადგილებს მოაჭრიდნენ, ხორცი არ გაფუჭდესო. მერე ბეწვს ატრუსავდნენ, ნადირმა ხორცი არ მოიტაცოსო. და ბოლოს, იქვე დატოვებდნენ თავიანთ ნიშანს — აკუხს,¹ მტაცებელი ნადირი და ჩიტები იმ არემარეს რომ არ გაჭაჭანებულყვენ.

დალამებამდე დაეხეტებოდნენ. მთელი დღის ნადავლს სადამოს შეაგროვებდნენ, გაატყავებდნენ და გამოშიგნავდნენ. ქონსა და ხორცს დაამარილებდნენ, მერე მალლა დაჰკიდებდნენ ხეზე და ქვემოდან ცეცხლს შეუწებებდნენ. ასე შაშხავდნენ ხორცს.

მეგობრებმა ნადირობით რომ გული იჯერეს, ნანადირევის ტყავებში გახვიეს ყველაფერი, ტვირთი შეკრეს და დილაადრიან გასწიეს შინისაკენ.

სადილობის დრო ახლოვდებოდა. მონადირეებმა ციცაბო კლდეები უკან მოიტოვეს. ხანგრძლივი ნადირობითა და მძიმე ტვირთით დაქანცულნი უხმოდ მიაბიჯებდნენ.

ქვემოთ წყარო მოჩუხჩუხებდა.

უცებ ხის ტოტმა გაიტკაცუნა. მიიხედ-მოიხედეს და რას ხედავენ: იქვე ახლოს, შქერის ბუჩქებიდან რუხ ირემს

¹ ეს სიტყვა არ ითარგმნება. აფხაზების რწმენით, როცა ნადირობის დემრთი რაიმეს მოგაპოვებინებს, სამაგიეროდ სანადირო აღჭურვილობიდან უნდა დაუტოვო ტყვია ან მარილი და ა. შ., რათა ნადირობის დემრთის გული მოიგო.

გამოუყვია თავი. წინ მიმავალმა მონადირემ ბარგი არც კი მოიხსნა, მშვილდი მოზიდა და ფოლადისთავიანი ისარი იხრემს დაუმიზნა.

— მოიცა, არ ესროლო! — დაუყვირა ჯამხუხმა ამხანაგს. — ვერ ხედავ, რა კეთილი, ადამიანური თვალებით შემოგვცქერის?

ირემი მართლაც უძრავად იდგა, მხოლოდ კისერი წაეგრძელებინა და შეშფოთებული უმზერდა მისკენ მიმავალ მონადირეებს, შიშისაგან სულ კანკალებდა. შორიდან არაფერი ჩანდა, მაგრამ მონადირეები მიხვდნენ, რომ მას სიცოცხლეზე მნიშვნელოვანი და ძვირფასი რამ აქვავებდა ადგილზე.

მონადირემ მშვილდი ძირს დაუშვა. ჯამხუხი დაწინაურდა და ირმისკენ წავიდა. დიდ მუხას ამოფარებულ ნელ-ნელა უახლოვდებოდა ირემს. მერე ფრთხილად შემოუარა ხეს და აი, საოცრება! ირემი არც დაიძრა ადგილიდან. თითქოს ოთხივე ფეხით მიწაში იყო ჩაფლული. ჯამხუხის დანახვაზე ოდნავ შეკრთა, მაგრამ გაქცევა აზრადაც არ მოსვლია. ფურ-ირემს ორი უმწეო ნუკრი ამოფარებოდა.

ჯამხუხს ირმები განსაკუთრებით უყვარდა, მით უმეტეს დედას ნუკრიც თუ ახლდა, გული სულ მათკენ უწევდა. ისე მიაცქერდებოდა, თითქოს დიდი ხნის უნახავ მეგობარს შეხვდაო. ალბათ, თვითონ რომ ობოლი იყო, ამიტომ შენატროდა ირმების ოჯახს.

ჯამხუხი ახლაც დიდხანს იდგა გაოგნებული, შორს გაიტაცეს ფიქრებმა, ვერც კი გაიგო მეგობრების წასვლა.



ამბობდნენ, ჯამხუხი ბავშვობისას ირმის ჯოგში მისი დრილაო. ერთ წელზე მეტხანს თურმე ირმის რძით საზრდოობდა. ეს ამბავი თვით ჯამხუხსაც ჰქონდა ყურმოკრული და თითქოს აგონდებოდა კიდევ მსგავსი რამ. მის ველურობას ისიც მოწმობდა, რომ სხეული რუხი ფერის ხშირი ბეწვით ჰქონდა დაფარული. ჯამხუხს რცხვენოდა და მუდამ ცდილობდა, არავის ენახა შიშველი.

ახლა, როცა ირემს და მის ნუკრებს შეხედა, ჯამხუხს უნებლიეთ ბავშვობა მოაგონდა. სიზმარივით ახსოვდა, პატარა ბიჭუნა ირმებს შორის რომ იდგა და ძუძუს დაეძებდა. ტყეში თუ რამე გაფაჩუნდებოდა და დაფრთხებოდნენ ირმები და ნუკრები, პატარა ჯამხუხიც ფეხდაფეხ მისდევდა მათ...

დედა ირემი ჯამხუხს უკვე თვალს უსწორებდა, აღარაფრის ეშინოდა. მიხვდა, რომ ეს მისი მოკეთე იყო, არც მის შვილებს დაუშავებდა რასმეს. გულდამშვიდებულმა ფურ-ირემმა განაგრძო ფოთლების ღეჭვა, მერე დინჯად დაიძრა ადგილიდან, ნაბიჯს თანდათან უმატა, ნუკრებიც კუნტრუშით დაედევნენ დედას.

ირმის შვილი ჯამხუხი დიდხანს გაჰყურებდა ბედნიერ დედა-შვილს, არ იცოდა, რა ექნა — მათ გაჰყოლოდა, თუ დაბრუნებულ იყო. ბოლოს, თითქოს რაღაც გადაწყვიტაო, ამხანაგებს წამოეწია.

— ნანადირევი შინ თქვენ წაიღეთ, მე კი ცოტას კიდევ წავინადირებ, — უთხრა ჯამხუხმა მეგობრებს. მობრუნდა და იმ გზას დაადგა, საითკენაც რამდენიმე წუთის წინ ირემი და მისი ნუკრები წავიდნენ. ჯამხუხს უნდოდა ერთხელ კიდევ შეეხედა ირმის ოჯახისათვის, ერთხელაც მო-

ეგონებინა ბავშვობა და ამ ტკბილ მოგონებებთან მარტოდმარტო დარჩენილიყო.

ჯამხუხის მეგობრებმა წამოიკიდეს ტვირთი და მდინარის გაყოლებით გასწიეს შინისაკენ. ჯამხუხი კი უღრან ტყეს შეერია და შეუმჩნევლად დაშორდა თანამგზავრებს.

ბევრი იარა ჯამხუხმა, მთელი დღე-ღამე იარა, მაგრამ ირმის კვალს ვერსად მიაგნო.



შუალამე იქნებოდა. ირმის შვილი ჯამხუხი დაღლილ-დაქანცული შევიდა დაბურულ მუხნარში. იფიქრა, ცოტანს დავისვენებ და მერე ამხანაგებთან დავბრუნდებიო. მშვილდ-ისარი გვერდით დაიდო, საჭიროებისთანავე ხელთ რომ ჰქონოდა. ნაბადი ძირს გაშალა, წამოწვა, თავი მუხას მიადო და იმწამსვე მკვდარივით ჩაეძინა. ჩაეძინა და ასეთი სიზმარი ნახა:

...უამრავი ხალხი შეგროვილა. რაღაც დიდი ზეიმი უნდა იყოს. მოშორებით წრე შეუკრავთ. ტაშს უკრავენ, მღერიან. წრეში ორი ყმაწვილი ცერებზე ცეკვავს.

საცაა ჯირითი დაიწყება, მხედრების გარშემო ხალხი ბუზივით ირევა. მოჯირითეთა შორის დგას ცხენზე ამხედრებული ჯამხუხი.

ის მოხდენილად ზის ცხენზე. აბრეშუმის ახალუხიდან თეთრი საყელო უელავს. რუხი ფერის ჩოხა აცვია. შვენის ვერცხლით მოჭედული ქამარ-ხანჯალი.

ჯირითიც დაიწყო. ჯამხუხმა ცხენი შეათამაშა, მოსხლიტა ადგილიდან, მერე მაგრად მოჭიმა ლაგამი. ცხენი ყალყზე შედგა. ჯამხუხმა დასჭყვილა, წინ გადაიზნიქა, ცხენი შურდულივით გავარდა ჩამწყკრივებულ ხალხს შორის. თხუთმეტიოდე ნახტომი და ვაჟკაცის ძლიერმა ხელმა შეაჩერა ბედაური. ბედაურმა ფლოქვით მოხნა მიწა, ბდღვირი ადინა იქაურობას.

აფხაზეთში კარგ მოჯირითედ ის ითვლება, ვისი ცხენიც მიწას ღრმა ნაკვალევს დაამჩნევს. ჯამხუხი თავგამოდებით ასრულებს ურთულეს იღეთებს. მისი ჩოხა-ახალუხის კალთებს არც ერთი ნაოჭი არ ატყვია. ისე მსუბუქად ზის ცხენზე, თითქოს უნაგირს შერწყმიაო.

ის იყო, ჯამხუხს მესამედ უნდა გაეჭენებინა ცხენი, რომ უცებ მაყურებლებმა შეთქმულებივით ერთად შემოჭკრეს ტაში. მოხუცებმაც ველარ შეიკავეს თავი და მიაძახეს: „გმირო შევარდენო! დღეგრძელი იყავ!“

ჯამხუხი განზე გადგა. ახლა მეგობარს დაუთმო ასპარეზი, ხალხი კი მაინც მის სახელს გაიძახოდა.

ამ დროს ირმის შვილთან ქალიშვილი მიიჭრა. თავსაფარი მოიხსნა და მიაწოდა. ეს ატარჩეის! დაწყებას ნიშნავდა.

ქალიშვილს მოკრძალებით გაუწოდა ხელი ჯამხუხმა, თავსაფარი ჩამოართვა, შეხედა და ადგილზე გაქცავდა, სუნთქვა შეეკრა. აბა, რა მოუვიდოდა, ქალიშვილი მზესავით ანათებდა.

¹ შეჯიბრების სახეობაა, როდესაც თავსაფრის მფლობელ ცხენონანს თავსაფრის წასართმევად მისდევს ყველა მოჯირითე.

ეს იყო მრა-კაპხა.

— რაღას უდგახარ! აბა, შენ იცი, ცხენოსნები გიპა-
ლოვდებიან, არ დაანებო თავსაფარი, — გააფრთხილა ქა-
ლიშვილმა ჯამხუხი.

და მართლაც, ცხენოსნებმა მოჰკრეს თუ არა თვალი.
მრა-კაპხას თავსაფარს, ელვის სისწრაფით დაედევნენ ჯამ-
ხუხს. ჯამხუხმა გაარღვია ხალხის ტალღა, ცხენოსნებს გა-
უსწრო და შურდულივით გავარდა ფართო მინდორზე.
თავსაფრის წვერი კბილებით ეჭირა. გრძელ თავსაფარს
ქარი მის ზურგს უკან აფრიალებდა. მდევერების მოახლო-
ებას რომ იგრძნობდა, ან თუ ვინმე გზის გადაჭრას მოუწ-
დომებდა, ჯამხუხი სხარტად შემოაბრუნებდა ხოლმე
ცხენს.

დაიქანცნენ მდევერები. აგერ, ერთი კიდეც გადმოაგლო-
ცხენმა, მაგრამ თავისას მაინც არ იშლის და ფეხით მის-
დევს ჯამხუხს. მეორე ვერა და ვერ გადაახტა ჭიშკარს, რო-
მელზეც ჯამხუხმა ჩიტივით გადაიქროლა. მდევარმა ტყუ-
რლუბრალოდ აწამა ცხენი. სხვა მოჯირითეები თანდათან
ანელებდნენ სვლას და გახვითქულ ცხენებს სული რომ მო-
ვთქვათ, ნელა მიჰყავდათ. ახლა ერთადერთი მხედარი მის-
დევდა ჯამხუხს. ნაბიჯით თუ რჩებოდა. საითკენაც გა-
უხვევდა ჯამხუხი, ისიც იქით მიჰყვებოდა.

ირმის შვილი მთელი ძალით ერეკება ცხენს, მდევარი
ფეხდაფეხ მიჰყვება. ჯამხუხს ესმის ცხენის ფლოქვების
ხმა.

— ჩემი ნუ გეშინია, ხელს არ შეგიშლი! — უცებ მო-
ესმა ჯამხუხს ქალის ხმა. — რაც დედას უნდა შვილის სა-
ბედნიეროდ, მეც იმას გისურვებ. ძალიან მომწონს შენი

არჩევანი, კარგი ქალიშვილია. ღმერთმა ორივე გაბედნი-
ეროთ!

— ნუთუ ქალია? — გაუკვირდა ჯამხუხს. უნდოდა
კარგად შეეხედა. შემობრუნდა და რას ხედავს, მღვეარი
თურმე მისი აღმზრდელი ფურ-ირემი ყოფილა...

ხმელი ტოტების ტკაცუნმა გამოაღვიძა ჯამხუხი. შეშ-
ფოთებული წამოიჭრა, თვალები მოიფშენიდა. თენდებო-
და. მის წინ ვიღაცამ გაირბინა. გახედა. მოწმენდილი ცის
ფონზე დამფრთხალი ირმის გავას მოჰკრა თვალი.

დიდი დათვის თანავარსკვლავედს შუაგულ ცამდე მი-
ელწია, შორს, დასავლეთით ფერდაკარგული მთვარე ეშვე-
ბოდა. ჯამხუხმა ნაბადი აიღო, დაბერტყა და მხრებზე მო-
ისხა. მერე გადაიკიდა მშვილდ-ისარი და შინისაკენ წა-
ვიდა.

ჯამხუხს მთელი გზა სიზმარი უტრიალებდა თავში.
ხშირად სმენია მრა-კაპხას სახელი. იგი თვალით არ ენახა,
მაინც ძალიან მოსწონდა. დღეს კი სიზმარში ნათლად გა-
მოეცხადა.

თუ აქამდე ჯამხუხის გულში სიყვარულის პატარა ნა-
პერწყალი ღვივოდა, ამიერიდან მოგიზგიზე კოცონი აინ-
თო.



იმ დღიდან ჯამხუხმა მოსვენება დაკარგა. აღარც ჭამ-
და, აღარც სვამდა. ძილი ხომ სულ გაუკრთა. იშვიათად თუ
ჩასთვლემდა, მაშინაც მრა-კაპხა ესიზმრებოდა.

თვალსა და ხელს შუა შეიცვალა ირმის შვილი ჯამხუ-



ხი. ყველას ჩამოშორდა. მეგობრებსაც აღარ ეკარებოდა, ხალისი სულ დაკარგა, აღარც დიდ ზეიმებს ესწრებოდა, აღარც სამოგზაუროდ დადიოდა, ჯირითიც მიატოვა.

ჯამხუხის მეგობრები ყველაფერს ამჩნევდნენ, მაგრამ არ იცოდნენ, რა ელონათ, რით დახმარებოდნენ. ჯამხუხი არავის უმხელდა თავის საიდუმლოს. დარდი დარდს ემატებოდა და გულზე ლოდევით აწვეებოდა.

ერთხელ ალაღბედზე გავიდა ჯამხუხი შინიდან. იფიქრა, გავივლი, იქნებ გული გადაეაყოლოო. სად არ იხეტი-ალა. ხან ზღვის ნაპირს მიადგა, ხან მთაზე ავიდა, უდაბნოც გადაიარა. ასე დაეხეტებოდა დილიდან საღამომდე, სადაც დაულამდებოდა, იქ ათენებდა. როცა დაიღლებოდა, დაანთებდა ცეცხლს, ხორცს შეწვავდა და შეიქცეოდა. შეშას და ხორცს ადვილად შოულობდა. ნავახშმევს რომელიმე ხის ქვეშ მოიკალათებდა, ნაბადში გაეხვეოდა და დამძინებდა. დილით ადრე გზას განაგრძობდა.

ასე ატარებდა დღეებს ირმის შვილი ჯამხუხი.

გავიდა ერთი წელი, ჯამხუხი კი ისევ დაეხეტებოდა. ერთხელ რომელიღაც მდინარეს მიადგა. ცოტა შეისვენა, მერე ნაპირ-ნაპირ გაჰყვა ბუჩქნარს. ბევრი იარა თუ ცოტა, წინ დიდი სოფელი გადაეშალა. ამ სოფელს მდინარე შუაზე ჰყოფდა. მდინარის ორივე მხარეს ქვისა და ხის სახლები იყო ჩამწკრივებული. აქა-იქ ფაცხებსაც დაინახავდით. მთის კალთებზე გაფანტული, მწვანეში ჩაფლული სახლები შორიდან ჩიტის ბუდეებს წააგავდნენ. ეზოებს მაღალი ყორე ჰქონდათ შემოვლებული. ეზოში კაკლისა და ვაშლის ხეები იყო.

ჯამხუხმა გაიფიქრა, აქ ალბათ მდიდარი ხალხი ცხოვ-

რობსო, მაგრამ სოფელში რომ შევიდა, სახტად იქაურობას ადამიანის ხელი არ ეტყობოდა. ეზოებს ეკალ-ბარდი მოსდებოდა. სახლთან მისასვლელი ბილიკიც მთლად მობარდულიყო. სულიერის ხმა არსაიდან ისმოდა.

— ამომწყდარა სოფელი, — დაასკვნა ჯამხუხმა. — ნეტავი რა შეემთხვათ საწყლებს?

ჯამხუხმა გადაწყვიტა, რადაც არ უნდა დაჯდომოდა, გაეგო სოფლის დაღუპვის ამბავი.

ერთ ჭიშკარს მიაღვა. მოსინჯა, მაგრად იყო ჩაკეტილი. ეზოში ხეებს შორის თვალი მოჰკრა ქვის სახლს. სახლის კარი ფიცრებით იყო ატყედილი. ეტყობოდა, ამ ეზოში რამდენიმე წელია ადამიანს ფეხი არ დაედგა. ჯამხუხმა სახლს შემოუარა და ქოხი შენიშნა. ქოხს დამპალი სახურავი ალაგ-ალაგ ჩამოცვენოდა. ზოგან გაჭვარტლული ლარტყე-ბი ეკიდა. შუა ეზოში იდგა დიდი ვაშლის ხე. წითლად ანათებდნენ მწიფე ვაშლები.

ირმის შვილი დიდი ვაი-ვაგლახით გადაძვრა ღობიდან ღობეზე, ეზოდან ეზოში და, როგორც იქნა, შუა სოფელში ვიწრო ბილიკი აღმოაჩინა. ბილიკი ქვის გალავანს გასდევდა. ჯამხუხი გაჰყვა მას და მიაღვა დიდ სასახლეს. სასახლე სუროს დაეფარა. საკვამურიდან ბოლი ამოდიოდა. ჯამხუხმა ეზოში გადაიხედა. ეზო დაგვილი იყო, თითქოს მალალმა გალავანმა გადაუღობაო გზა ეკალ-ბარდსა და სარეველას. ჯამხუხი ეზოში შევიდა. მარცხნივ, გალავანთან ახლოს, ამობურცული ადგილები შენიშნა. „ალბათ, საფლავებიო“, — გაიფიქრა. შუა ეზოში დიდი, ტოტებ-ვაშლილი კაკლის ხე იდგა, თითქმის მთელ ეზოს ჩრდილავდა. ხის ძირას სკამები იდგა.



ჯამხუხი გულდასმით ათვალეიერებდა ეზოს. მერე ჭიშკარს მიადგა, ურდული გადასწია და ეზოში შევიდა.

— მასპინძელო! ჰეი, მასპინძელო! — დაიძახა ჯამხუხმა და სახლის კარს მიადგა.

ხმა არავინ გასცა. ეზოში მოზრდილი ნაგაზი იწვა და მზეზე თბებოდა. მან ნაძალადევად მოაბრუნა თავი. თვალი ოდნავ გაახილა, შეხედა შემოსულს და არც კი შეჰყეფა. ეტყობოდა, ამ უკაცრიელ ადგილას ყუფასაც გადაჩვეოდა.

ჯამხუხმა კარი შეაღო და ოთახში შევიდა. არავინ დაუხვდა. შემდეგ შევიდა მეორე. მესამე ოთახში, იქაც სიცარიელე იყო. ბოლოს სასახლის ერთ-ერთ დარბაზში მოხუცს წააწყდა. იგი ხის ტახტზე წამოწოლილიყო. ლეიბის მაგივრად ტყავები დაეგო.

— გამარჯობათ, — მიესალმა ჯამხუხი და მარჯვენა ხელი ასწია.

— გაგიმარჯოს, დად, — დახშული ხმით მიუგო მოხუცმა.

მოხუცს თავზე დიდი პირსახოცი ისე ჰქონდა შემოხვეული, თვალებიც აღარ უჩანდა.

— ვერ გიცანი, საიდანა ხარ? — მოხუცმა თვალეზზე ჩამოფხატული პირსახოცი აიწია და ყრუდ ჩაახველა. — ჰაიტ, დასწყევლოს ღმერთმა, ალბათ ბოლოს მომიღებს ეს ხველა.

ოთახში საშინელი უწესრიგობა იყო. მიყრილ-მოყრილ ტაბურეტებსა და გრძელ სკამებზე ტანსაცმელი ეყარა. ტახტის ქვეშ სანაგვე ნიჩაბი და ცოცხი ეგდო.

— მგზავრი ვარ, ირმის შვილი ჯამხუხი მქვია. თქვენს სოფელს დიდი უბედურება სწვევია. იქნებ რითიმე დაგეხმაროთ.

— თუ აგრეა, კეთილი იყოს თქვენი მობრძანება! —

დღივს ამოიღულულა მოხუცმა, ხველა აბრჩობდა, ^{საქართველოს} თუმალთან ხის ტოლჩა ედგა. ძლივძლივობით მისწვდა, აიღო და წყალი მოსვა. მერე ტოლჩა დადგა და დინჯად განაგრძო: — ეს ერთი გაჩანაგებული ქვეყანაა. ამ ქვეყანაში თხუთმეტი ოჯახი თუ იქნება, ისიც გაღატაკებული და გაუბედურებული. ამ უზარმაზარი სასახლის ბატონ-პატრონი მე და ჩემი შვილიშვილი ვართ. ხომ ხედავ, რისი შემძლეც ვარ, აგრემც ყველაფერი კარგი ნახოს შენმა თვალმა. აი, ასე გაძალღებულად მივათრევთ ცხოვრებას! — გული აუჩუყდა მოხუცს და ცრემლი მოერია.

ჯამხუხი გაოგნებული უსმენდა. თვალს არ აშორებდა. მოხუცს განიერ მკერდზე ჭაღარა წვერი ეფინა. გრძელი უღვაში გაბარდულ წვერში ჩახლართოდა. სახე ნიგვზის ნაჭუჭივით დაღარული ჰქონდა.

— ჩამოჯექი, თუ არ გეჩქარება. ჩემი ბიჭიც მალე მოვა, — სთხოვა მოხუცმა ჯამხუხს.

— სიამოვნებით.

ჯამხუხმა სკამი ახლოს მიიტანა და ჩამოჯდა. მერე მოკრძალებით ჰკითხა:

— თუ შეგიძლია, მიამბე, ასე ვინ აგაწიოკათ?

— ეს ქვეყანა ადრე უძლეველი იყო, — დაიწყო მოხუცმა, — ხალხი მდიდრულად ცხოვრობდა. დიდძალი ნახირი ჰყავდათ. ტყეში ათასობით საქონელს უშვებდნენ აჟვეიპშაასთვის!... თავისთვისაც საკმაოდ რჩებოდნენ. ეს სასახლე შვიდ ძმას ეკუთვნოდა. თურმე იმით პაპას აუშენებია შვილიშვილებისთვის. მართლაც ღირსეული ვაჟა-

¹ წინათ აფხაზები ათასი სული ნამატიდან ასს ტყეში გაუშვებდნენ ხოლმე, როგორც აჟვეიპშაას წილს.

ცები იყვნენ. ღმერთმა ბედი კი არ არგუნა. სიკეთით ყველასგან გამოირჩეოდნენ. ნადირობაში და ჯირითში ხომ ბადალი არ ჰყავდათ. მათი იმედით ხალხს გული საგულეს ჰქონდა. როგორც აფხაზები იტყვიან — მათ ქათმებს ქორი ვერ გაეკარებოდა. შვიდივე ცოლიანი იყო და შვიდთავეს თითო ვაჟი ჰყავდა. ბავშვები მცირეწლოვანები იყვნენ. უფროს ძმას ბაგარკანი ერქვა. ბაგარკანი მე და ჩემმა დედაბერმა გაგზარდეთ, ჩემი ვაჟის ტოლი იყო. სულ ერთად თამაშობდნენ. ძალიან უყვარდათ ერთმანეთი.

ცხრა მთას იქით საზარელი დევები ცხოვრობდნენ. მათი შიშით დედამიწაზე ჭიანჭველას ვერ გაეგლო და ცაში ფრინველს, თუმცა ჩვენს ქვეყანას ბაგარკანისა და მისი ძმების შიშით ახლოს არ ეკარებოდნენ.

ერთხელ ბაგარკანის ოთხი ძმა სანადიროდ წავიდა. მაშინ კი იხელთეს დრო დევებმა და თავს დაგვესხნენ. მას შემდეგ გავიდა... — მოხუცი მოიჭმუნა, ჩაფიქრდა, — საკმაოდ დიდი ხანი.

ბაგარკანი თეძოში დაიჭრა. სისხლისგან იცლებოდა, ვის ეცალა მისთვის? ძალა მოიკრიბა და თვითონ ამოიძრო ჭრილობიდან ისარი, მერე მოიხია ახალუხის კალთა, მაგრად შეიხვია ჭრილობა და ისევ თავგამოდებით შეუტია მტერს. ბაგარკანი თანდათან გრძნობდა, რომ ძალა ეცლებოდა, უმცროსი ძმაც სასიკვდილოდ დაიჭრა. ბაგარკანმა მოიხმო მეორე ძმა და საჩქაროდ გაგზავნა სანადიროდ წასული ძმების საძებნელად.

— აქ რომ დარჩე, მაინც ვერაფერს გახდები. უმჯობესია ძმებს შეატყობინო ჩვენი გასაჭირი, — უთხრა ბაგარკანმა.



სანამ ბაგარკანის ძმები მოვიდოდნენ, ყველაფერი დაწყდა. მძარცველებმა გაიმარჯვეს, აგვაწიოკეს. მთელი დოვლათი წაგვართვეს. ბევრი ჩვენიანი დახოცეს. ვინც გადავრჩით, პირუტყვთან ერთად გაგვრეკეს მთაში.

მახსოვს, როცა გვერეკებოდნენ, დევების უმცროსი ძმა დაუაპში ხან წინ გაგვისწრებდა, ზოგჯერაც ბოლოდან გამოგვძახებდა რამეს. თვალის დახამხამებაში ხან ერთი მხრიდან ამოგვიდგებოდა, ხან — მეორედან. ნელა რომ მივდიოდით, გული უწუხდა და მათრახით გვაჩქარებდა. ჰაიტ, წყალმა წაიღოს მისი თავი, მერე რა შესახელი იყო. ნამდვილი წითური გოლიათი გასლდათ. სიზმარში რომ გენახა, შევეშინდებოდა. სამი თავი ება. სახეები ერთიმეორეზე მახინჯი ჰქონდა.

სწორედ ეს დაუაპში შეება ბაგარკანს. პირველად ბაგარკანმა მოჰკვეთა ერთი თავი დაუაპსს. სანამ გოლიათი შემობრუნდა, მეორე თავიც ძირს გაგორდა. მაგრამ წუთიც არ გასულა, სამივე თავი კისერზე ება. დევს თუ ნაჭრილობებზე საჩქაროდ არ დააყარე ნაცარი და ნაკვერცხალი, ჭრილობა იმავე წამს მოუშუშდება. გამწარებულმა დაუაპშმა აღარ დააყოვნა და იქვე განგმირა ბაგარკანი.

მობოყს საშინელი ხველა აუვარდა და წყალი მოსვა.

— ჰოდა, იმას გეუბნებოდი. განაწამები ტყვეები, დაუაპშის გამოჩენაზე თვითონვე ვაჩქარებდით ნაბიჯს და მათრახის შიშით კისრის მტერევეით გავრბოდით: „არიქა. დაუაპში მოდის, თავს ვუშველოთ!“ უძლურ მოხუცებს ახალგაზრდები ეშველებოდნენ. ისე კი ნამდვილი ავი სული იყო დაუაპში. მის თვალს არაფერი გამოეპარებოდა. ვინც კი მოინდომებდა გაქცევას, სიკვდილი არ ასცდებოდა.

ვინ მოთვლის, ამ მიზეზით რამდენი ჩვენნიანი დაიხოცა. საწყლები, ცალ-ცალკეც ვერ დავასაფლავებ. შუა ტყეში გაგთხარეთ საერთო საფლავი და ყველა ერთად ჩავმარხეთ. ზაგარკანის და მისი ერთი ძმის ცხედარი მინდორში ვიპოვეთ, მალულად წამოვიღეთ და ამ სასახლის ეზოში დავასაფლავებ, შემოსასვლელში, ალბათ შენც შეამჩნევდი. თანთან ქვებიც დავუწყებთ. ასე იყო თუ ისე, ზოგიერთებმა რის ვაი-ვაგლახით მოვახერხებთ ტყვეობიდან გაქცევა და აქ დაბრუნება. მტერსაც კი არ ვუსურვებ იმას, რაც აქ ვნახებთ. შარაგზაზე აბლაგლებული საქონელი დაეხეტებოდა. რამდენიმე დღის გამოუწველავი ცურები გასკდომაზე პქონდათ. სიმწრისგან არ იცოდნენ, რა ექნათ. დამწყვდეული მშვიერი ხბოები ზოგი დახოცილიყო, ზოგი სულს დაფავდა, ძაღლებიც კი შიმშილისაგან ისე დასუსტებულყენენ, ძლივს დალასლასებდნენ და საცოდავად წკმუტუნებდნენ.

თუკი რამ ცოცხალი ვნახე, თან წამოვიყვანე. ვიფიქრე — გამოგვებავ, გადავარჩენ და მერე იქნებ პატრონიც გამოუჩნდეს-მეთქი. შენი მტერი გამოჩნდეს ისე.

დოვლათი რომ შეგვენარჩუნებინა, მუშახელი იყო საჭირო. აბა მე და ჩემი შვილიშვილი რას გავხდებოდით! დავსახლდით ამ სასახლეში და რაც შეგვეძლო მოვუარეთი აქაურობას. მართალია, ძმები დაიღუპნენ, მაგრამ იქნებ მათი შვილები გადარჩნენ და როდისმე დაუბრუნდნენ თანთან სახლ-კარს-მეთქი. ამასობაში კარგა ხანი გავიდა და კაცის ფეხი არ დადგმულა ამ მიწაზე.

მოხუცს პირი უშრებოდა და წარამარა წყლით ისველებდა გამხმარ ტუჩებს. ხან ჩაფიქრდებოდა, თითქოს რადაცას იგონებსო.

— თუმცა, — განაგრძო მოხუცმა, — ერთხელ გზად მი-
მავალმა მონადირეებმა აქ პატარა ბიჭუნა მოიყვანეს, რომელიც
შვი სულ ბეწვით იყო დაფარული. ასე თქვეს, ირემს წა-
ვართვით, თავის ნუკრებთან ერთად ზრდიდაო.

მოხუცი ასე დაუძღურებული რომ არ ყოფილიყო, უეჭ-
ველად შეამჩნევდა, ამ სიტყვებზე როგორ შეერთა მისი
სტუმარი. ჯამხუხმა მაშინვე შეიკრა ჩოხის სახელო, ბეწ-
ვი დაიფარა.

ჯამხუხი ადრეც ხვდებოდა, რომ მას დედა-მამა არ
ზრდიდა. ირმებთან რომ რაღაც აკავშირებდა, იმასაც
გრძნობდა. ალბათ ამიტომ უყვარდა ირმეში ასე ძლიერ.
თუმცა ჯამხუხმა მაინც ვერ შეიტყო, ვინ იყვნენ მისი
მშობლები. მხოლოდ ის გაიგო, რომელი ქვეყნიდან იყვნენ.

ის ღამე ჯამხუხმა მოხუცთან და მის შვილიშვილთან
გაათენა. მთელი ღამე საუბარში გაატარეს. მოხუცი ისე
იყო დანატრებული ლაპარაკს, დილამდე სიამოვნებით
ყვებოდა ბაგარკანისა და მისი ძმების ამბავს. ჯამხუხი და-
ძაბული უსმენდა. უნდოდა ყველაფერი დაწვრილებით გა-
ეგო. თუმცა მაინც ვერ შეიტყო მშობლების ვინაობა.

მეორე დღეს, დილით ადრე ჯამხუხი გაუდგა გზას. გა-
დაწყვიტა, რაღაც არ უნდა დამიჯდეს, გავიგებ, სად არის
აქედან გადახვეწილი ხალხი, რა ბედი ეწიათ უცხო ქვეყა-
ნაში და ძალ-ღონეს არ დავიშურებ მათ დასახმარებლადო.

დილით ჯამხუხმა ისაუზმა, გამოემშვიდობა მასპინძ-
ლებს და გზას გაუდგა. მდინარის ნაპირს გაუყვა. უნდოდა
დეგების სამფლობელოში მოხვედრილიყო.

კაშკაშა მზიანი დღე იდგა. შუადღე ახლოვდებოდა. მდინარის ნაპირს დასასრული არ უჩანდა. ჯამხუხმა უკან მოიტოვა თვალუწვდენელი ველები. ახლა მალალ მთას აუყვა.

გაიარა ერთი ტყე, მეორე, მესამე... უცებ მუხლებზე დაჩოქილი კაცი დაინახა. თავი მიწაზე ედო და რალაცას გულმოდგინედ უსმენდა. ცალი ყური მიწაზე კომბოსტოს ფოთოლივით გაეშალა. თვალები ხან გაუბრწყინდებოდა, ხან კი ცრემლით ევსებოდა.

— გამარჯობა, — მიესალმა ჯამხუხი. მაგრამ დიდყურამ არ უპასუხა. ხელითა და ფეხით ანიშნა, დამაცადე, ხელს ნუ მიშლიო.

განცვიფრებული ჯამხუხი გაიტრუნა. ცოტა ხნის შემდეგ დიდყურა წამოდგა და ჩაილაპარაკა:

— რას არ გაიგებ ამქვეყნად, — მერე მუხლები ჩამოიბერტყა და ჯამხუხს მიუბრუნდა, — ღმერთმა გამარჯვება ნუ მოგიშალოს!

— რას უსმენდი ასე გატაცებით? — ჰკითხა ჯამხუხმა.

— ჭიანჭველები დავობდნენ ერთ ახალ ამბავზე და იმან გამიტაცა, — მიუგო დიდყურამ.

— ასეთი რა ახალი ამბავია?

— რა და დევების სამფლობელოში ერთი ქვრივი ცხოვრობს. მას მზეთუნახავი ქალიშვილი ჰყავს, მრა-კაპხა.

— რაო? მრა-კაპხა? — გააწყვეტინა ჯამხუხმა.

— ჰო, მრა-კაპხა. მათ გვერდით ცხოვრობენ დევები. უმცროსს დაუაპში ჰქვია.

— დაუაპში? — აქ კი ველარ შეიკავა თავი ჯამხუხმა. მოხუცის ნაამბობი გაახსენდა. თვალწინ დაუდგა სამთავიანი გოლიათი.

— დიას, დაუაპში, — გაუმეორა დიდყურამ. აპშს შვილი არ ჰყავდა. ძალიან განიცდიდა უშვილობას. ექვსი წლის შემდეგ შეეძინა ვაჟი. დაუაპშმა განიზრახა თავისი ვაჟი მრა-კაპხაზე დაექორწინებინა. ცოტა ხნის შემდეგ დაუაპშმა დედა-შვილს ამცნო თავისი სურვილი. ქალიშვილმა სასტიკი უარი განუცხადა დაუაპშს: თუ როდისმე გავთხოვდები, მხოლოდ ირმის შვილ ჯამხუხზეო.

— მერე, მერე? — ვერ ითმენდა ჯამხუხი.

— განა დაუაპშმა რამედ ჩააგდო ქალის ნათქვამი? წუხელ თავს დასხმია ქვრივს და ქალიშვილი მოუტაცნია. საბრალო დედა სულ თმას იგლეჯდა თურმე, მაგრამ ვინ შეიბრალა. დაუაპშს წამოუყვანია მრა-კაპხა და კოშკში გამოუმწყვდევია. ასე მეყოლება, ვიდრე ჩემი ვაჟი საქორწინო არ გახდებაო.

ჯამხუხი საშინლად დააღონა ამ ამბავმა. აღარ იცოდა, რა ექნა. დიდყურამ მაშინვე შეამჩნია ჯამხუხს დამწუხრება და ჰკითხა:

— რა მოგივიდა, ასე რამ დაგაღონაო?

— ირმის შვილი ჯამხუხი მე ვარ, — მიუგო მან და სწრაფად გაეცალა.

— ოჰ! როგორ გატკინე გული, — ამოიკვნესა დიდყურამ. — თუ ნებას მომცემ, წამოგყვები, იქნებ რამეში გამოგადგეო.

მიდიოდა ჯამხუხი. დიდყურა გვერდით მიჰყვებოდა. გრძელი ყურები სიარულის დროს მხრებზე ეპარტყუნებოდა.

მიდიოდნენ ისინი დევების მალალი მთებისაკენ.

ორი დღე-ღამე იარეს ჯამხუხმა და დიდყურამ. მესამე დღეს ერთ კაცს წააწყდნენ, იდგა და ზეცაში იმზირებოდა. წელში გამართულს ცალი ხელი მიწაზე ედო, ზედ ეყრდნობოდა.

— გამარჯობა! — უთხრეს გრძელხელას.

— ყოველივე კარგს მოესწარით, — მიუგო მან. მერე ფართო ხელისგული შუბლზე მიიფარა და ისევ ზეცას ახედა.

ჯამხუხმა და დიდყურამაც იქითკენ გაიხედეს, საითაც გრძელხელა იცქირებოდა. მზე კაშკაშებდა, ცა მოწმენდილი იყო, მაგრამ ვერაფერი დაინახეს.

— გვითხარი, რას გასცქერი. ჩვენ რომ ვერაფერს ვხედავთ? — ჰკითხა ჯამხუხმა.

გრძელხელას არც შეუხედავს მათთვის, ისე უპასუხა:

— შარშან ამ დროს, სწორედ ამ ადგილას, გარეული ინდაურების გუნდმა გადაიფრინა. კეტი მოვუქნიე. ინდაურები კეტმა სულ მალლა აიტაცა. ახლა ველოდები, საცაა კეტი და ინდაურები ძირს ჩამოცვივიანო.

— ოჰო! რა მსროლელი ყოფილხარ. ბარაქალა! შარშანდელი ნასროლი წლეულამდე თუ არ ჩამოვარდნილაო, — გაიკვირვეს ჯამხუხმა და დიდყურამ.

— ეს რა გასაკვირია. ირმის შვილს ჯამხუხს რომ იცნობდეთ, მაშინ რალას იტყვიეთ, — თქვა გრძელხელამ და მგზავრებს აღმაცრად გადახედა.

— ირმის შვილი მე ვარ, მაგრამ სხვებისაგან არაფრით გამოვიჩივიო, — უთხრა ჯამხუხმა.

— როგორ? შენ, ირმის შვილი ჯამხუხი ხარ? — ლიდან ხელი ჩამოიღო გაკვირებულმა გრძელხელამ, — თუ ასეა, დღეს ჩემთან უნდა წამოხვიდეთ სტუმრად. აქვე ვცხოვრობ, გამოქვაბულში. — სთხოვა გრძელხელამ და ორივეს მოხვია გრძელი ხელი.

— ღმერთმა სიმდიდრე ნუ მოგიშალოს! სტუმრობაზე უარს როგორ ვიტყვით. მაგრამ არ გვცალია, ძალიან გვეჩქარებაო, — მოუბოდიშა ჯამხუხმა.

გრძელხელა არაფრით არ მოეშვა. მერე დიდყურამ მოუცლელობის მიზეზიც დაწვრილებით უამბო. საქმეს თუ დროზე არ მივხედეთ, ჯამხუხის საცოლეს დაუაპშის ხელში საფრთხე მოელისო.

— თუ ასეა, მეც წამოგყვებით. იქნებ რამეში გამოგადგეთო, — უთხრა გრძელხელამ.



მიდიოდნენ ირმის შვილი ჯამხუხი, დიდყურა და გრძელხელა. სამი დღე-ღამე იარეს. ერთი მთა კიდევ გადაიარეს. მეოთხე დღეს ალპიურ ზონაში აღმოჩნდნენ. იქ ცხვრის ფარა ძოვდა. შუა ფარაში წითელნაბდიანი მოხუცი ჯოხზე დაყრდნობილიყო და ჩიბუხს აბოლებდა.

იქვე დიდი ნაგაზი იწვა და კუდს ათამაშებდა.

— რეიტ კეუ! — მოესმათ საიდანღაც ხმა.

მიიხედეს და რას ხედავენ, ერთი ახალგაზრდა დახტის შთიდან მთაზე. ხან ხევში ჩახტება და იქიდან ერეკება გაფანტულ ცხვრებს.

— გიმრავლოს ფარა! — უთხრეს მეგობრებმა მოხუცს.

— ღმერთმა გაბედნიეროთ. კეთილი იყოს თქვენი მობრძანება, — მიუგო მოხუცმა.

— კეთილი იყოს თქვენი მობრძანება! — მოისმა ის ნაცნობი ხმა, წელან რომ შორიდან გაიგონეს.

აი, სასწაული თუ გინახავთ. ამ მთის მწვერვალებზე მონავარდე ჭაბუკს ორივე ფეხზე წისქვილის ქვეები ება. მას თავისუფლად დგომა არ შეეძლო. სულ უნდა ევლო. ამ წუთას რომ აქ იყო, მეორე წუთს სადღაც შორს გამოჩნდებოდა.

— ვაი, შენს დედას, — შეწუხდნენ ჯამხუხი და მისი მეგობრები.

— რა ძალა გადგია, რატომ არ მოიხსნი ამოდენა ქვეებს, ნუთუ არ გაწუხებ? — ჰკითხა ჯამხუხმა.

— ესეც რომ არ მქონდეს, რისი მაქნისი ვიქნები. ამითაც ძლივს ვახერხებ ფარის მოვლას. ზოგჯერ ისე შორს გაიშლებიან, კარგი ბიჭი ხარ და მორეკე. თუკი რიგიანად არ მიხედე, რაღა მწყემსი ხარ.

ჯამხუხი და მისი მეგობრები გაოცებული შეჰყურებდნენ. ქვისფეხა ისევ მოიჭრა მათთან და უთხრა:

— ჩემი რომ გიკვირთ, ალბათ ირმის შვილი ჯამხუხი არ გინახავთო.

— მერე შენ გგონია, ჯამხუხი შენზე სწრაფი მორბენალია? — ჰკითხა ჯამხუხმა.

— ჩემზე სწრაფი კი არა, მისი მსგავსი ჯერ არ გაჩენილა ამქვეყნადო, — მიუგო ქვისფეხამ. — აბა, იკითხე, მთელი მწყემსები ამას ამბობენო.

— ტყუიან. მე ვარ ირმის შვილი ჯამხუხი. აბა, მითხარი, რით გამოვიჩინე სხვებისგან.

ქვისფხვამ პირი დააღო. ირმის შვილი შეათვალიერა.
მერე მოხუცს გასძახა:

— აუ, ბაბუა, გესმის? ირმის შვილი გვესტუმრაო.

მოხუცის სიხარულს საზღვარი არ ჰქონდა. სთხოვა
ჯამხუხს:

— თუ მართლა ირმის შვილი ხარ, არსად გაგიშვებთ.
ორი-სამი დღე ჩვენთან დარჩით სტუმრად. მეგობრებთან
არ შეგარცხვენთ. ერთი ჩვენი პურ-მარილიც გასინჯეთო.

მოხუცი სტუმრებს გზაზე გადაუდგა. გასაქანს არ აძ-
ლევდა.

— ღმერთმა სიმდიდრე ნუ მოგიშალოთ, ჩვენ კი და-
სარჩენად არ გვცალია. დევების სამფლობელოში მიგვეჩ-
ქარებო, — აუხსნა ჯამხუხმა.

— იქ მისვლასაც მოასწრებთ, — არ ეშვებოდა მოხუ-
ცი. — ასეთი საპატიო სტუმრები უპატივცემლოდ როგორ
გაგიშვათ. სხვა რომ არაფერი, მეზობელი მწყემსები რას
იტყვიან. სტუმრის მიღება ვერ შესძლესო, ხომ მოგვეჭრა
თავი?

კიდევ დაღამდა. მაგრამ სახიფათო გზა ჰქონდათ გა-
სავლელი, თანაც ხათრი ვერ გაუტეხეს მოხუცს და გადა-
წყვიტეს იქ დარჩენა. ივანშმეს. მერე დიდხანს ისაუბრეს.
მოგზაურობის მიზეზიც უამბეს მასპინძლებს.

— მართლაც დიდი საქმე გქონიათ. მეც წამოგყვებით,
შეიძლება რამეში გამოგადგეთ. სხვა თუ არაფერი, სისწ-
რაფეში ბადალი არა მყავსო, — უთხრა მეგობრებს ქვის-
ფხვამ.

— ძალიან ცარგიო, — მათაც მიუგეს.

ქვისფხვამ ნახირი მოხუცს ჩააბარა და ჯამხუხს გაჰყვა.

ჯამხუხს უკვე ოთხი მეგობარი ჰყავდა. ოთხივე ერთნაირად განიცდიდა ირმის შვილის ტანჯვას. მიდიოდნენ დაფიქრებულნი. ვინ იცის, რამდენი მთა გადაიარეს. მესამე დღეს ფიჭვნარში ამოჰყვეს თავი. ოფლად იღვრებოდნენ. გზას დასასრული არ უჩანდა. ძალზე დაიქანცნენ. მოსწყურდათ კიდეც. უცებ მდინარის კალაპოტს წააწყდნენ. შუადღე ახლოვდებოდა. მდინარე ახლად ამომშრალი იყო. იფიქრეს, ალბათ ვიღაცამ მდინარეს კალაპოტი ახლახან თუ შეუცვალაო.

გაჰყვნენ მდინარის კალაპოტს. გზაც იქით ჰქონდათ. ცოტა მოშორებით ჩანჩქერის ხმაური გაიგონეს. მერე მდინარეც დაინახეს, მაღალი მთიდან გადმოჩქეფდა. მისი შხეფები ჰაერში ვერცხლისფრად იმსხვრეოდა. მდინარესთან ახლოს მივიდნენ. ისევ სასწაული. სადაც ჩანჩქერი ეცემოდა, ერთი ჭაბუკი დამდგარიყო, პირი გაეღო და მდინარის წყალი პირდაპირ პირში ჩაუდიოდა. ეტყობოდა, წყურვილს ვერ იკლავდა და გამწარებული ყვიროდა:

— წყალი, წყალი, წყურვილით ვკვდებით!

დიდხანს უმზერდნენ ჯამხუხი და მისი მეგობრები ამ სანახაობას, ზოლოს ჰკითხეს:

— ისეთი რა წყურვილი გკლავს, მდინარემ ვერ დაგიცხროო?

— სამი დღეა წვეთი წყალი არ დამიღვევია, წყურვილისგან ვიხრჩობიო, — მიუგო ხვრებიამ.

— სამი დღის მოწყურებულს კი არა, ვის არ ეყოფოდა ამდენი წყალი? — თქვა გაოცებულმა დიდყურამ.

— თქვენ ჩემი გიკვირთ და აბა, ერთი ირმის შვილი
ჯამხუხი ნახეთ, მაშინ რაღას იტყვიეთო, — ნიშნის მოგე-
ბით ჩაილაპარაკა ხვრებიამ.

— ირმის შვილი ჯამხუხი მე ვარ. შენ კი როგორ შე-
გედრები. ახლა მეც მწყურია, მაგრამ ერთი ყლუპი წყალი
მეყოფაო, — უთხრა ჯამხუხმა.

ხვრებიამ წყალს თავი ანება და ჯამხუხს მიუბრუნდა.

— რაო? შენა ხარ ირმის შვილი? აქ რამ მოგიყვანა.
ახლოს მოდი, შენი ჭირიმე, რამდენიც გინდა, დალიე, —
უკან დაიხია ხვრებიამ.

მდინარის კალაპოტი ისევ აივსო, აქაფდა და გაჰყვა
თავის დინებას. მეგობრები ნაპირთან დასხდნენ და ცოტა
დაისვენეს. წყლის სმითაც გული იჯერეს. ხვრებიასაც უამ-
ბეს თავიანთი გასაჭირი. მერე ადგნენ და წასასვლელად
მოემზადნენ. ხვრებიამაც ისურვა მათთან ერთად წასვლა.

— უარს ნუ მეტყვიო, იქნებ რამეში მეც გამოგადგე-
ოთ, — სთხოვა მეგობრებს.

აბა, უარის თქმა რა საკადრისი იყო. ხელი გადახვიეს
ახალ მეგობარს და გაუდგნენ გზას.

სამი დღე-ღამე შეუსვენებლად იარეს. მეოთხე დღეს
შევიდნენ დაბურულ ტყეში. პანტა ვაშლის ძირას დასხ-
დნენ, დაისვენეს. დაღლილობისგან ხმას ვერ იღებდნენ.
მათ ზემოთ, ხის კენწეროზე ორი ჩხიკვი შემოჯდა. ამ
დროს საიდანღაც გამოვიდა ალვის ხესავით წვრილი და
მალალი ახალგაზრდა. მას არც კი შეუხედავს, ვინ იჯდა

ხის ძირას. ხეზე აცოცდა და ჩხიკვებს მიუახლოვდა. მერე გამოაძრო ერთ ჩხიკვს ბუმბული და მეორეს გაუკეთა. ასე აძრობდა ბუმბულს, ხან ერთსა და ხან მეორეს. ჩხიკვები, ეითომც აქ არაფერიყო, ვერაფერს გრძნობდნენ.

— ხედავ, რას აკეთებს? ჩხიკვები კი აინუნუნიაც არ არიან, — გაუკვირდა ჯამხუხს.

— ხა, ხა, ხა. — გაიცინა ხელმარჯვემ და მგზავრებს ჩამოსძახა: — ირმის შვილ ჯამხუხს რომ იცნობდეთ, ჩემი სმარჯვე სულაც არ გაგაოცებდათ.

— მე ვარ ირმის შვილი, — ასძახა ჯამხუხმა. — მაგრამ რამდენიც არ უნდა ვეცადო, ვერ შევძლებ მაგგვარ რამესო.

— შენა ხარ ჯამხუხი? — დაიყვირა ხელმარჯვემ, ძირს ჩამოვიდა და მეგობრებს მიესალმა:

— გამარჯობათ!

— ღმერთმა გამარჯვება ნუ მოგიშალოს! — უპასუხეს და ფეხზე წამოდგნენ.

მერე ისევ დასხდნენ და დაიწყეს თავიანთი ამბის მოყოლა. შეწუხდა ხელმარჯვე. სხვა რა უნდა ექნა. შესთავაზა მეგობრებს:

— თუ ასე გაქვთ საქმე, იქნებ მეც გიშველოთ, წამოვალ თქვენთან ერთადო.

ღეგების სამფლობელოსკენ მიმავალ გზას ექვსი მეგობარი მიჰყვებოდა — ირმის შვილი ჯამხუხი, დიდყურა, გრძელხელა, ქვისფეხა, ხვრებიან და ხელმარჯვე.

იარეს, იარეს და ერთ მთიან ქვეყანას მიაღწენ.

მზე ჩადიოდა. ფერდობზე ფარა გაშლილიყო. ახლოს რომ ჩაუარეს, მეცხვარის ძაღლებმა უცხოები შენიშნეს და ყფა ატყეხეს. კარვიდან მოხუცი გამოვიდა. ძაღლები დატუქსა.

— ეშმაკმა წაიღოს თქვენი თავი. ხმა ჩაიკმიდეთ! — მოხუცი დაიხარა, თითქოს ჯოხს იღებსო. ძაღლები პატრონის დანახვისთანავე დაფრთხნენ.

მოხუცი და მგზავრები მიესალმნენ ერთმანეთს. როგორც წესი, მოხუცმა უცხოები შინ მიიპატიჟა. მგზავრებმა უარი უთხრეს, შორი გზიდან მოვდივართ, ძალიან გვეჩქარება, დევების ქვეყანაში მივდივართო.

— კარგი, ბაბა, თუ დაუაპშის სამფლობელოში მიგეჩქარებათ, ზევრი აღარ დაგრჩენიათ სავალი. შეისვენეთ ცოტა. აი, იქ ცხოვრობს დაუაპში, — მოხუცმა მთის ფერდობისკენ მიუთითა.

მგზავრებმა ბურუსში ძლივს გაარჩიეს უზარმაზარი სასახლე. სასახლეს ირგვლივ მაღალი გალავანი ჰქონდა შემოვლებული.

— თვითონ დაუაპში ეს წუთია აქ იყო და წავიდა. ამ ბოლო ხანებში დიდი ხნით ვერ ტოვებს სახლს. ძმებს შურისძიების ეშინიათ. ქალი ჰყავთ მოტაცებული და იმას დარაჯობენ. ამიტომ გეუბნებით, დარჩით ამაღამ ჩემთან-მეთქი. დამე მათსა ვერავინ შევა.

— განა არის ამქვეყნად ვინმე, ვისიც დაუაპს ეშინია? — ჰკითხა ჯამხუხმა.

— არის, დად. ხომ გაგიგიათ — მჯობნის მჯობნი არ

დაიღვევო, — მიუგო მოხუცმა. — მოტაცებულ ქალიშვილს მრავალაბა ჰქვია. იგი ვიღაც მთის გადაღმელ ჭაბუკზე ყოფილა დანიშნული. აი, მისი შიში აქვს დაუაპს. დაუაპსის დედა გულთმისანია. იმანაც გააფრთხილა თავისი ვაჟები, ეგ ქალი ავ საქმეს შეგყრიოთ. დედის წინათგონის სჯერათ და სახლს არ შორდებიან.



ჯამხუხი და მისი მეგობრები გამოემშვიდობნენ მოხუცს და გზა განაგრძეს. როგორც იქნა, კითხვა-კითხვით მიადწიეს მრავალაბას დედასთან. იგი სოფლის განაპირას ცხოვრობდა. ოროთახიანი ქვის პატარა სახლი ედგა. დიდ ოთახში ცეცხლი უკვე ჩაფერფლილიყო. მბჟუტავი ნაკვერცხლების შუქზე კედლები ნაცრისფრად გამოიყურებოდნენ. აქ ცხოვრობდა მარტოხელა ქვრივი.

იგი დაბალ სკამზე იჯდა და ფიქრში წასული კერიას მისჩერებოდა.

სტუმრების დანახვაზე ქვრივი მაშინვე აფუსფუსდა. გადასძახა მეზობლებს. გააჩადეს ცეცხლი. მოამზადეს ვახშამი და რაც შეეძლოთ გაუმასპინძლდნენ საპატიო სტუმრებს. მერე ქვრივმა დაწვრილებით უამბო თავისი უბედურების ამბავი; წინათ თურმე ეს ხალხი ბედნიერად და მდიდრულად ცხოვრობდა. ერთხელ მათ თავს დასხმია დაუაპში და მისი ძმები. აუწიოკებიან ხალხი. ვინც დახოცეს, დახოცეს, ვინც არადა დაუტყვევებიათ და პირუტყვთან ერთად გაურეკავთ.



— ვისაც სიარული არ შეეძლო, — ყვებოდა ქვრივი ფეხში წააგლებდნენ ხელს და პირდაპირ ხრამში გადასებდნენ. ქალები და ქალები ცალ-ცალკე მიჰყავდათ. ჩვენ მხსნელი არაფერ იყო. ის შევიდი ძმა, ვინც გვიცავდა, ადრე დაიღუპა. უფროსს ბაგარკანი ერქვა. მე და ბაგარკანის ცოლი მთელი გზა ერთად მივდიოდით. საწყალი ავად იყო. ხელში ერთი წლის ბიჭუნა ეჭირა. ხშირად ვეშველებოდი ბავშვის ტარებაში. არც მე შემწევდა დიდი ძალა, ფეხმძიმედ ვიყავი მრა-კაბხაზე. ძლივს მივჩანალებდით. სხვებს რომ ჩამოვრჩებოდით, მძარცველები ზურგში გვირტყამდნენ. რამდენჯერ დავეცით კიდეც, მაგრამ თვითონვე წამოვბობდებოდით. უმცროს დევს დაუაპში ერქვა. ეს იყო ყველაზე ავი და ბოროტი. რამდენიმე ძმა ბაგარკანმა მოუკლა, ერთი ათად იყო გაბოროტებული და ჯავრს ჩვენზე იყრიდა. უცებ შეამჩნია, მე და ბაგარკანის ცოლი რომ ჩამოვრჩით. გაშმაგებული მოიჭრა, დედას ბავშვი ხელიდან გამოგლიჯა და შქერებში გადაისროლა. მოვრთეთ წივილ-კივილი, მაგრამ ვინ იყო განმკითხავი. ბაგარკანის ცოლმა ვერ გაუძლო ამ უბედურებას და იმ ღამითვე გარდაიცვალა. ჩვენ აი, აქ შემოგვრეკეს. მე ქალიშვილი შემეძინა, მრა-კაბხა. გადიოდა წლები. იზრდებოდა ჩემი გოგონა. რაც შემეძლო ვანებივრებდი. პატარა ქალბატონივით ვზრდიდი. ჯერ ისევ ბავშვური გარეგნობა ჰქონდა. ზეიმ-ზეც კი არ ეპატიჟებოდნენ. საიდანღაც მისთვის თვალი მოუკრავს წყნულ დაუაპს. ერთხელ გამომეცხადა და მიბრძანა: ჩემი ცოლი ფეხმძიმედ არის, თუ ვაჟი შემეძინა, იცოდე, შენი ქალი უნდა შევრთოო. მის სიტყვებს მაშინ არ მივაქციე ყურადღება. მაგრამ, ჩემდა საუბედუროდ, მა-



ლე მოლოგინდა დაუაპშის ცოლი და მართლაც ვაჟი შეეძინა. ბიჭი რომ ხუთი წლის შეიქნა, დაუაპშმა მომტაცა ჩემი მრა-კაპხა. არაფრად ჩააგდო ჩემი თხოვნა და ცრემლი. რა ხანია შვილი არ მინახავს. ვინ იცის, იქნებ მომიკლეს კიდევ, — ამოიკვნესა ქვრივმა.

ჯამხუხი რაღაც ეჭვებმა შეიპყრეს.

— სხვას ვერაფერს გაიხსენებთ ბაგარკანის ცოლსა და მის ბავშვზე? — ჰკითხა ქვრივს.

— როგორც ვთქვი, ბაგარკანის ცოლი საღამოს გარდაიცვალა. ღამით კაცებმა მალულად დაასაფლავეს, პატარა მუხის ძირას. თავთან ქვა დაუდეს, საფლავი რომ არ დაკარგულიყო. მას შემდეგ დიდი დრო გავიდა, აღბათ ველარც კი ვიცნობ იმ ადგილს. ბუჩქებში ჩაგდებული ბავშვის ტირილი ახლაც ყურში მესმის. ვერ აგიწერთ, რა საცოდაობა იყო. ბავშვი ტირილით მოიწვედა. დედა, დედაო, — გაიძახოდა. ოჰ, საბრალო ჯირი! მართლა ფოლადივით მაგარი ბიჭი იყო და ჯირიც იმიტომ დაარქვეს. — ქვრივს ცრემლი მოერიდა. მერე ჩაფიქრდა. — კიდევ რა. ჰო, ბავშვს მარცხენა იდაყვის ქვემოთ ხალი ჰქონდა.

ამის გაგონებაზე ჯამხუხი შეტოკდა. ხალზე იტაცა ხელი და მოეფერა. ქვრივის ცრემლით სავსე თვალებს არ შეუმჩნევია ჯამხუხის მოძრაობა. იგი ისევ იმეორებდა:

— მარცხენა იდაყვის ქვემოთ ხალი ჰქონდა. მრავალძარღვას ფოთოლივით დიდი და მოწითალო. მეორე ხალი აი, აქ ჰქონდა, — თქვა ქვრივმა და ჯამხუხს ზურგზე მიადო ხელი. — ასე დავტოვეთ ატირებული ბავშვი და წავე-

1 სახელია, ნიშნავს ფოლადს.



დით. საცოდავი, ალბათ მხეცებმა შეჭამეს. აბა, ვინ იატყვი
და. მაშინ აქ გზაც არ იყო.

ჯამხუხმა ასე მოულოდნელად გაიგო თავისი თავგადა-
სავალი. მოხუცისა და ქვრივის ნაამბობმა იგი საშინლად
ააფორიაქა. აღარაფერი ესმოდა, ვერაფერს ხედავდა. ქვრი-
ვი კი განაგრძობდა:

— ჩემს გოგონას რომ დაუაპშისთვის უარი არ ეთქვა,
ალბათ არ წამართმევდა მის თავს. მრა-კაპხამ ისიც უთხ-
რა, ირმის შვილის გარდა არავის გავყვები ცოლადო.

— რაო, ირმის შვილიო? — ჯამხუხს გაუკვირდა,
ქვრივმა რომ მისი სახელი ახსენა.

— ჰო, ჯამხუხის გარდა არავის გავყვებიო. ორი-სამი
წელია სულ ამ სახელს გაიძახის. დაუაპშსაც ეშინია ჯამ-
ხუხის. ამბობენ, გმირთა გმირიაო. სწორედ ამიტომ მო-
იტაცა ჩემი ქალი, ჯამხუხს რომ არ დაესწრო მისთვის. ახ-
ლა გამოკეტილი ჰყავს და ახლოს ვერავინ გაეკარება. დე-
ვებმა სასახლის გალავანს ღრმა არხი შემოავლეს. როცა
თვითონ მოუნდებათ გავლა, მაშინ ხიდს გადებენ, გაიგ-
ლიან თუ არა, ისევ აიღებენო, — ჩიოდა ქვრივი.

— ეს არის ირმის შვილი ჯამხუხი. სწორედ მრა-კაპ-
ხას დასახსნელად მოვიდა იგი, — უთხრა დიდყურამ და
ჯამხუხზე მიუთითა.

— შემოგველოს ჩემი თავი, აი, თურმე ვისი ქება-დი-
დება ისმის. მე რომ ბედი მქონოდა, ცოტა ადრე გამოჩნ-
დებოდი, ვიდრე მრა-კაპხას წამართმევდნენ, — ატირდა
ქვრივი.

მეგობრებმა დაამშვიდეს საბრალო ქალი. ბოლოს გა-
დაწყვიტეს, ის ღამე მასთან გაეთიათ. დილით ადრე კი
თავს დასხმოდნენ დევებს.

გავარდა ხმა. ჯამხუხი და მისი მეგობრები ქვრივთან არიან სტუმრადო. იმავე ღამეს შეიკრიბნენ ახალგაზრდები. მოილაპარაკეს და გადაწყვიტეს, ალყა შემოერთყათ დაუაპშის სასახლისთვის. გაუგზავნეს მოციქულები და შეუთვალეს — დაგვიბრუნეთ მრა-კაპხა და დატყვევებული ხალხი გაათავისუფლეთო.

დაუაპშსა და მის ძმებს ეს სასაცილოდ არ ეყოთ.

ჯამხუხის მოციქულები დაიჭირეს. ერთი მაგრად გაროზგეს და საჯინიბოში ჩაყარეს.

ჯამხუხი და მისი მეგობრები ელოდნენ პასუხს, მაგრამ არც პასუხი ჩანდა და არც გაგზავნილი ხალხი. ყველა ჯამხუხს უცდიდა, რას იტყვისო.

— თავს უნდა დავესხათ, სხვა გზა არ არის. მოლაპარაკებით მათთან ვერაფერს გავაწყობთო, — თქვა ჯამხუხმა, ხმალი იშიშვლა და ხალხს წინ გაუძღვა.

მიადგნენ წყლით სავსე არხს. დევები აივანზე გადმომდგარიყვნენ და სიცილით იგუდებოდნენ: ერთი ვნახოთ, აქეთ როგორ გადმოსცურავთო.

უცებ ხვრები გამოეყო მეგობრებს, არხთან მიიჭრა და ხვრება დაიწყო. წყალი თანდათან დაიწია და დაშრა. დაუაპშმა გაკვირვებისაგან პირი დაალო, ეს რა სასწაული ვნახეო.

დევების დედამ თავს: ვაჟიშვილები იხმო.

დაუაპშმა ბრძანა, იქვე გავესოთ არხი.

ოცდახუთი ახალგაზრდა დევი შეუდგა ბრძანების შესრულებას. არხი კვლავ წყლით აავსეს. ხვრები კი ხვრებად

და ხვრებადა. ჯამხუხმა და მისმა მეგობრებმა, როგორც ვხედავთ, არხი გადალახეს.

ადაუს დედამ გააფრთხილა შვილი:

— დაუაპშ, ნურაფრის იმედი ნუ გაქვს. იმათ ვერაფერს დააკლებ. ჯობია ტკბილად მოელაპარაკო და მერე ვნახოთ, რაც იქნებაო.

დაუაპშს დედის სიტყვები სასაცილოდ არ ეყო:

— ექვსიოდე მაწანწალას გულისთვის თხუნელასავით წინასწარ დავითხარო თვალები? რას ბოდავ, დედაჩემო, ხომ არ გაგიყდიო.

დაუაპშმა და მისმა ძმებმა არ დაუჯერეს დედას. გამოვიდნენ აივანზე და რას ხედავენ. არხში წვეთი წყალი არაა. ჯამხუხი და მისი მეგობრები საცაა გალავანს მიადგებიან.

დაუაპშს ფერი ეცვალა. ძმებიც შეშინდნენ. ჯამხუხი ჭიშკარს მიუახლოვდა. მოსწია ჭიშკარი, მაგრამ ნურას უკაცრავად, ძვრა ვერ უყო.

სასახლის გვერდით მალალ კოშკში იჯდა მრა-კაპხა. ყური მოუკრავს. შენი მხსნელები საცაა სასახლეს მოადგებიან, არხიც ამოაშრესო, და სარკმლიდან გადმოიხედა. მისმა ბრწყინვალეობამ შუქი მოჰფინა იქაურობას. ქალი ძირს გადმოიხარა. ჯამხუხმა და მრა-კაპხამ თვალბში შეხედეს ერთმანეთს. რაინდები ჭაშკარს ვერ აღებდნენ. დაღონებულმა მრა-კაპხამ თავისთვის ჩაილაპარაკა:

— ეჰ, ჯამხუხი რომ თავის ხანჯალს ჩემი თმის ბეწვზე გაუსვამდეს, მერე ყველივით გაჭრის ფოლადის კარსო.

დიდყურამ ყური მოჰკრა მის ნათქვამს და მაშინვე ამცნო მეგობრებს. ხელმარჯვე იმწამსვე აიწელა, მიეპარა



ქალს და მოაცალა ნაწნავიდან სამი ბეწვი. მისცა ჯამხუხს. ჯამხუხმა თმა ხანჯლის პირს გაუსვა. მერე მოუქნია ფოლადის ჭიშკარს და მართლაც ორად გააპო. ახლა გრძელხელას ჯერი დადგა. მან წამოავლო ხელი ჭიშკრის ნამჭვრევებს და დევების მცველებს ესროლა. ბევრი დაიხოცა. ზოგმა თავს უშველა და გაიქცა. მერე გრძელხელამ ხე მოგლიჯა, აივანს შესტყორცნა და ჩამოანგრია. დაუაპშმა მოასწრო განზე გახტომა.

დევები ავადმყოფ დედასთან შეცვივდნენ.

— ხომ გითხარით, ძალით ვერაფერს გახდებით-მეთქი. მოელაპარაკეთ, ასე აჯობებს, — გააფრთხილა ისინი დედამ.

ახლა ძმები დარწმუნდნენ, სწორად რომ არ მოიქცნენ. შეშინდნენ. იფიქრეს, იფიქრეს და ისევ შერიგება ამჯობინეს. სთხოვეს ჯამხუხს და მის მეგობრებს, სტუმრად მობრძანდით ჩვენთანო.

მეორე დღეს დაუაპშის სასახლეში მეფური სუფრა იყო გაშლილი. ჯამხუხი და მისი მეგობრებიც იქ იყვნენ.



დაუაპშმა და მისმა ძმებმა იფიქრეს ჩვენი სტუმრები ნამუსიანი ხალხი ჩანს. პურ-მარილს დაგვიფასებენ და იქნებ კარგი თვალით შეგვხედონო. მერე საქონელიც მივცეთ საჩუქრად, ნამუსზე შევაგდოთ და სხვას აღარაფერს მოგვთხოვენო.

ძმები სტუმრებს მოწიწებით შეეგებნენ ჭიშკართან, შინ შეიპატიჟეს. შუა დარბაზში გრძელი მაგიდა იყო გა-

წყობილი, ჩიტის რძეც არ აკლდა. რა საჭმელ-სასმელსაც
ათასნაირი ღვინო, რა გინდა, სულო და გულო, რომ
ყოფილიყო. სუფრას შემოუსხდნენ. დაუაპშმა თამალობა
თვითონ ითავა. პირველმა ასწია ღვინით სავსე ახმაჩირი¹.

— სანამ პურ-ღვინოს მივირთმევთ, ჩვენს მოთხოვნა-
ზე პასუხს მოველითო, — თქვა ჯამხუხმა.

დაუაპშს პირკატა ეცა. თვალები აემღვრა, სისხლით
ავესო და სიბრაზე რომ დაეფარა, ძმებს რაღაც გადაულა-
პარაკა. ჯამხუხი თვალს არ აშორებდა. „აი, როგორი ყო-
ფილა დაუაპში, — ფიქრობდა იგი. — მაღალი, მხარბეჭი-
ანი... დამჯდარიც კი არ შინნახევრით მაღალი იყო სხვებზე.
თავები ტანთან შედარებით ძალიან პატარა აქვს. თავიდან
ფეხებამდე გაბანჯგვლულია, სიზმარში რომ ვინმემ ნახოს,
ალბათ შიშისაგან ველარც გაიღვიძებს“.

ძმები შესახედავად ჰგავდნენ დაუაპშს, მაგრამ მათ თი-
თო თავი ჰქონდათ.

— გვესმის თქვენი, — ძმებთან გადალაპარაკების შემ-
დეგ მიუგო დაუაპშმა. — რად გინდათ ამდენი აყალმაყალი.
მოვიფიქროთ რამე. აი, ამ ეზოში ალბათ შეამჩნევდით დიდ
ბოძს. იგი სათამაშოებითაა შემკული. მსროლელები მას
ზოგჯერ მიზანში ესვრიან. გამარჯვებული ის გამოდის,
ვინც მეტ სათამაშოს ჩამოაგდებს. აი, იმ ბოძზე ავიდეს
რომელიმე თქვენგანი ისე, რომ თავზე ცხელი წყლით სავ-
სე თეფში ედგას და თუ არც ერთი წვეთი არ გადმოედგრე-
ბა, თქვენი ტყვე ვიქნებით, თუ არადა გაჩუქებთ რამდენი-
მე სულ საქონელს და ამით დავამთავროთ ჩვენი საქმეო, —
უთხრა დაუაპშმა.

¹ ხის ტოლჩა.



ჯამხუხმა რაღაც გადაუჩურჩულა თავის მეგობრებს, მერე დაუაპშს მიუბრუნდა და უთხრა:

— კარგი. მაგაზე ადვილი რაღა იქნებაო.

ყველა ჩავიდა ეზოში. დაუაპშმა ფეხი მოითრია. დაუ-
ძახა მერიქიფეს და დაავალა, ყველა რომ ეზოში იქნება,
სტუმრებს ტოლჩებში საწამლავი ჩაუსხიო. გაიგონა დიდ-
ყურამ. შეწუხდა. აწრიალდა. ვერ იქნა და ვერ შეარჩია
დრო, რომ ჯამხუხისთვის ეთქვა ეს ამბავი.

მოიტანეს ცხელი წყალი. დაასხეს თეფშზე. ჯამხუხმა
თეფში თავზე დაიდგა და ბოძს შემოაჭდო ხელ-ფეხი. თვა-
ლის დახამხამებაში ზედ მოექცა. ერთი წვეთი წყალი არ
დაღვრილა. დაუაპშს გულზე შემოეყარა, „მალღა თუ ასე
სწრაფად ავიდა, ძირს უფრო მალე დაეშვება. ვაითუ ვერ
მოასწროს მერიქიფემ ტოლჩებში საწამლავის ჩასხმას“.

ჯამხუხმა მალლიდან გადაიხედა. შორს, მგლები ხრო-
ვა რომელიღაც ცხოველს დასეოდა და გლეჯდა. მგლები
რომ დაიფანტნენ, ჯამხუხმა მისი გამზრდელი ირემი იც-
ნო. საბრალო იწვა და სულს დაფავდა. მგლებს მისთვის
ყელი გამოელადრათ. ჯამხუხს ცრემლები ჩამოსცვივდა და
მიწაზე დაეცა. დევები აღრიალდნენ:

— წააგო, წააგო! — მერე ჯამხუხი მიიყვანეს და მი-
წაზე დაღვრილი წვეთები აჩვენეს.

— ეს წყალი არ არის, ჩემი ცრემლია. შეხედეთ, თეფ-
ში სავსეაო, — უთხრა ჯამხუხმა.

— რა გატირებდაო, — ჰკითხეს.

ჯამხუხმა უამბო ყველაფერი.

დაუაპში და მისი ძმები მაინც არ იჯერებდნენ. ჯამხუ-
ხი მეორედ ავიდა ბოძზე. ძმებსაც ის უნდოდათ, დრო გა-

ეყვანათ. ჯახმუხს მეორედაც წვეთი წყალი არ გადმოღვრია თეფშიდან. ამასობაში მერიქიფემ მოასწრო თავისი საქმე, საწამლაგი სტუმრების ტოლჩებში ჩაასხა. დაუაპშს რაღა ეთქმოდა. თავი დამარცხებულად სცნო და ჯახმუხი და მისი მეგობრები მაგიდასთან მიიპატიჟა.

ოთახში შესვლამდე დიდყურამ ხელმარჯვეს უთხრა, ჩვენი მოწამვლა უნდათო. ხელმარჯვემ არც აცია, არც აცხელა და ტოლჩებს ადგილი შეუცვალა.

სუფრას მიუსხდნენ. დაუაპშმა ტოლჩა აიღო და წარმოთქვა:

— დიდად ნასიამოვნები ვარ ასეთი შეუპოვარი გმირების გაცნობით. დაე, ჩვენი შეხვედრა არ იყოს პირველი და უკანასკნელიო, — და ტოლჩა დაცალა.

სტუმრებიც და მასპინძლებიც ფეხზე წამოდგნენ, ერთხმად შესვეს ეს სადღეგრძელო. გაჩაღდა ქეიფი. ყველანი დათვრნენ.

დაუაპში პირველი სასმისის შემდეგ თვალს არ აშორებდა სტუმრებს. მოუთმენლად ელოდა საწამლაგის მოქმედებას. მაგრამ თავად დაეხვა თავბრუ, თვალეზი აემღვრა, ველარაფერს ხედავდა. ირგვლივ ყველაფერი დატრიალდა. ვერ გაუძლო და მაგიდაზე დაეცა. ძმებმა დაუაპში რომ წაქცეული დაინახეს, მიშველება უნდოდათ, მაგრამ ძალა არ ეყოთ. გადმოცვივდნენ სკამებიდან და იატაკზე დაეცნენ. ახლა დაუაპშმა მოიკრიბა ღონე. წამოიწია, ძმებს გადახედა და ისიც ძირს დაეცა. თვალეზი გადმოუცვივდა, ხელ-ფეხი მოეგრიხა, ყბა მოექცა. მიხვდა, მისი აღსასრულის დღე დამდგარიყო, ამოიკვნესა და პირქვე დაემხო.

ეს ამბავი ქვეყანას მოედო. სასახლისაკენ მიიჩქაროდა

დიდი თუ პატარა. მრა-კაპხას დედაც მივიდა. გაიმართა ახალი ნადიმი. ჯამხუხი და მისი მეგობრები მრა-კაპხას კოშკისკენ გაეშურნენ.

დეგების დედამაც გაიგო შვილების ამბავი. უკანასკნელი ძალა მოიკრიბა, ლოგინზე წამოჯდა და დაიწყებულა: „დეგების ღმერთო, მოწყალეო! იმ ხალხს, ვინც ჩემი შვილები გაანადგურა, ქვად გადაუქციე მრა-კაპხა. მანამ ნუ დახოცავ მათ, სანამ სულ არ გააუბედურებ მრა-კაპხას. დასწყევლე მათი სიცოცხლე, ნუ გამოუღევი ტანჯვასო“.

ჯამხუხი და მისი მეგობრები შეცვივდნენ კოშკში. ფანჯარასთან გაქვავებული მრა-კაპხა იდგა. სახეზე სათნოება ეხატა. თვლებიდან სიყვარული გამოკრთოდა. გრძელი, სქელი თმა ჩანჩქერივით ეყარა მხრებზე. ქვაღქციულიც ძალზე მიმზიდველი იყო.

ჯამხუხს გული შეეკუმშა. ცრემლი ყელში მოებჯინა. ამხანაგებმა თავი ვერ შეიკავეს, მწარედ ატირდნენ. დედამისს ვერავინ ვერ აკაგებდა. მისი გოდება ზეცას სწვდებოდა.

სიხარული გლოვის ზარმა შეცვალა. მხოლოდ დაუაბნის ავადმყოფი დედა ზეიმობდა.



სასახლის ეზო გაჭედული იყო ხალხით. შუაში დიდი კოცონი დაენთოთ და დამწუხრებულები შემოსხდომოდნენ. შინ წასვლას არავინ ფიქრობდა. ვის არ დააღონებდა მრა-კაპხას ბედი. ჯამხუხის ტანჯვას ხომ საზღვარი არ

ჰქონდა. ვერ ისვენებდა, წინ და უკან დააბიჯებდა. საბრალო ქვრივი, ძაძებში გამოწყობილი, ფეხით დაჯდომილი ქვადქცეულ შვილს. უბედურ დედას წუთითაც არ შორდებოდნენ მეზობლის ქალები, გვერდით მოსხდომოდნენ და მასთან ერთად გულდამწუხრებულნი მოთქვამდნენ.

ეზოს ერთ კუთხეში, დიდი ფიჭვის ძირას დიდყურა განმარტოებულიყო. მალლიდან ფრთების ბათქუნი შემოესმა. აიხედა. ხის ტოტზე მტრედები ისხდნენ. დიდყურა გაიტრუნა.

— კრრუ, კრრუ! — შეიფრთხიალა ერთმა.

— რა მოგივიდა? — ჰკითხა მეორემ.

დიდყურამ ლელვის ფოთოლივით გაშალა ყური, სმენად გადაიქცა.

— ხედავ, რა ქნა დაუაპშის დედამ? — თქვა პირველმა მტრედმა. — როგორ გააქვავა საბრალო მრა-კაახა. გული მიდულს, დედამისს რომ ვუყურებ.

— ვხედავ, როგორ არ ვხედავ. დასწყევლოს შაშვიმ! ის კუდიანი დედაბერი. აგრემც მოისპოს მისი სახელი ამქვეყნად, — მიუგო დედა მტრედმა.

— მომიყევი, გეთაყვა, რა მოხდა, — სთხოვა დედა მტრედმა.

მამა მტრედი მომალლო ტოტზე მოხერხებულად მოკალათდა და დაიწყო:

— თორმეტი მთისა და თორმეტი ბარის გადაღმა საუცხოო ქვეყანაა გადაშლილი. იმ ქვეყანაში წინათ ბევრი ხალხი ცხოვრობდა. შვიდი ძმა იცავდა ამ ქვეყანას. ერთ-ერთ ძმას ბაგარკანი ერქვა. შვიდივე ერთიმეორეზე უკა-

¹ შაშვი ღმერთია.



თესი იყო. ცხოვრობდნენ ძმები ბედნიერად, შეხმატკბილდებოდნენ ზულად. ხშირად დადიოდნენ სანადიროდ. ნადირობით ერთობოდნენ, შინ ორ-სამ თვეს არ ბრუნდებოდნენ.

ერთხელ ბაგარკანის ოთხი ძმა გაემგზავრა სანადიროდ. შინ დარჩენილებს მოულოდნელად დაუაპში დაესხა თავს. მას თერთმეტი ძმა ჰყავდა. რა უნდა ექნათ, ბაგარკანი და მისი ორი ძმა ეკვეთნენ თორმეტ დევს. თავგამოდებით იბრძოდნენ ძმები. დევების გვარში ყველაზე ძლიერი სამთავიანი დაუაპში იყო. ბაგარკანმა რამდენიმე დევი მოკლა, მაგრამ მტრის გასროლილი ისრით თვითონაც მძიმედ დაიჭრა. ბაგარკანის მეორე ძმას პირისპირ შეება დაუაპში და კისერში გაურჭო ხანჯალი. სასიკვდილოდ დაჭრილი ბაგარკანი მიხვდა, ვედარაფერს გავხდებითო. მოიხმო მესამე ძმა, ყველაზე უმცროსი, და სანადიროდ წასული ძმების საძებნელად გავზავნა. ბაგარკანის უმცროსი ძმა დაედევნა სანადიროდ წასულ ძმებს. ყველგან მოიძია, სადაც ეგულებოდა. სამი დღის სავალი ერთ დღეში გადაიარა, ბოლოს მაინც მოძებნა ძმები. შეატყობინა, თავს დევები დაგვესხნენო. ბაგარკანი მძიმედ დაგვიჭრეს, ერთი ძმაც მოგვიკლესო.

შეწუხდნენ ძმები, მიატოვეს ნანადირევი და საჩქაროდ გასწიეს შინისაკენ, უმოკლეს გზას დაადგნენ. წამით არ შეჩერებულან, გადაჭრეს მთები, კლდეები, ტყეები...

დევების უფროს ძმას ჯაჭვის პერანგი ეცვა და ისე იბრძოდა. სახეზე ფოლადის ნიღაბი ეკეთა. ხმლითა და ისრით ვერაფერს დააკლებდი. ბაგარკანმა ხომ მოასწრო და სამი დევი სასიკვდილოდ დაჭრა. სამივე იმწამსვე დასვეს საკაცეზე და შინ წაიყვანეს. დაჭრილ ძმებს წინ დაუაპში გაუ-

ძღვა. დატყვევებულ ხალხს აბღავლებულ საქონელთან ერთად მიერეკებოდნენ. არც ისე ადვილი იყო ამდენი ტყვე და მოტაცებული საქონლის კლდე-ღრეზე გადაყვანა. მოშორებით, ქვემოთ პატარა მდინარე გამოჩნდა.

— ყმაწვილო, აბა ერთი მდინარეზე ჩაირბინე და ეს ტოლჩა გამივსე, ლამისაა სული გამძვრეს წყურვილით, — უბრძანა უფროსმა დევმა ტყვეს და ქამრიდან ხის ტოლჩა მოიხსნა.

ტყვემ ტოლჩა გამოართვა და მდინარისკენ დაეშვა. სწორედ ამ დროს მდინარის მეორე მხარეს ბაგარკანის ძმებმა ჩაიარეს. დევები მდინარიდან ცოტაოდენი მოშორებით მოდიოდნენ. ბაგარკანის ძმები ვერც შეამჩნევდნენ მათ.

ტყვემ ტოლჩას რამდენჯერმე გამოავლო წყალი და მდინარეში ჩაღვარა. წყლის ჩხრიალი შემოესმა ბაგარკანის ერთ-ერთ ძმას და მოიხედა. მდინარის გაღმა თავისი მტრები დაინახა. აბა, ვის არ მოხვდებოდა თვალში აყლაყულა დევი.

დევმა ტყვეს ტოლჩა გამოართვა და პირზე მიიყუდა. ბაგარკანის ძმამ ველარ მოითმინა და ისრით დევს თავი შუაზე გაუპო.

— უჰ, იხაროს მისმა მარჯვენამ. მსროლელიც ასეთი უნდა! — აინთო დედა მტრედი.

— ჰოდა, ბაგარკანის მეორე ძმამ, არც აცივა, არც აცხელა, აიღო ლოდი და რაც ძალი და ღონე ჰქონდა გადაისროლა. ლოდი მეორე დევს დაეცა და იქვე გააფრთხოვინა სული. ბაგარკანის მესამე ძმის ნატყორცნმა ქვამ მესამე დევს გამოსთხარა თვალი. გამწარებული დევი კლდიდან



გადავარდა და უფსკრულში ჩაიჩხა. მართალია, ბაგარუკანის ძმები გაიჟლიტნენ, მაგრამ არც მტერს დააყენეს კარგი დღე. თორმეტი დევიდან დაუაპშმა და მისმა ძმებმა შინ ექვსი ცხედარი წაიღეს. ეს რომ მათმა დედამ გაიგო, კინალამ თავი მოიკლა. მის მწუხარებას საზღვარი არ ჰქონდა. თავში ხელს იცემდა, სახეს იხოკავდა. თავს დასდგომოდა დახოცილ შვილებს და გაბოროტებული ღმერთს ევედრებოდა, „აფი! შენ შეისმინე ჩემი ვედრება. ჩემი ვაჟების მკვლელები თვითონაც ხომ დაიხოცნენ, მაგრამ წყეულიმც იყვნენ მათი შვილები! ვინც ბაგარუკანის ძმებს ამცნო დევების თავდასხმა, მისმა ვაჟმა სიკვდილამდე ფეხებზე დოლაბებდაკიდებულმა იაროს. ვინც წყლის ჩხრიალი გაიგონა, მის ვაჟს უზარმაზარი ყური გაეზარდოს, ყველას დასაციინი გახდეს“.

ეს რომ დიდყურამ გაიგონა, ცოტა არ იყოს, შეიშმუშნა და ყურზე ხელი მოისვა.

მამა მტრედმა განაგრძო.

„ჰო, ვინც ჩემი შვილი მოკლა, როცა წყალს სვამდა — მისმა ვაჟმა ვერასდროს ვერ მოიკლას წყურვილი და სასაცილოდ გაებეროს მუცელი“. — მერე, დაუაპშის დედამ თქვა, „ვინც ჩემს შვილს ლოდი ესროლა, მისმა შვილმა თავის დღე და მოსწრება მიძიმე ტვირთი ზიდოს, ვინც ჩემს შვილს ქვით გამოსთხარა თვალი — მის ვაჟს ისე დაუგრძელდეს ხელი, მხოლოდ ქვის გასროლა შეეძლოს“. ბოლოს კი მისი ყველაზე საყვარელი შვილის მკვლელი დასწყევლა: „მისი ვაჟი გველთევზასავით გაწვრილდეს და და-

1 აფი — ელვის ღმერთი.

გრძელდეს, ძვლებიც გაუქრეს სხეულში“. დედაბერს ეგონა ბაგარკანის ვაჟი ტყეში დაიღუპებო და ის აღარ დაუწყევლია. ისე კი საბრალო ბავშვს ტყეში წანწალისა და სიცვიისაგან ირმის ბეწვით დაეფარა სხეული, — ამოიღულუნა მტრედმა.

ყველაფერი მოისმინა დიდყურამ.

— ნუთუ ამ სიმახინჯის წამალი არ არსებობს? — არ ისვენებდა დედა მტრელი.

დიდყურას სუნთქვა შეეკრა. სმენად იქცა.

— როგორ არა. შვიდი მთის გადაღმა, ზღვის პირას ფიჭვნარია. შუა ფიჭვნარში მინდორია. შუაგულ მინდორში უზარმაზარი ცაცხვის ხეა. იგი ხუთძირადაა ამოსული. ერთ-ერთის კენწეროზე ჩიტის ბუდეა. ბუდეში ორი ბარტყია — შავი და თეთრი. თუ ვინმე თეთრ ბარტყს ჩამოიყვანს და დაუაპშის დედასთან გაუშვებს, დედაბერი მაშინვე მოკვდება. თეთრი ბარტყი გაიტაცებს მის სულს. მერე, ვინც ამ დედაბერს დაუწყევლია, სიმახინჯისაგან თავისთავად განიკურნება. ქვაღქცეული მრა-კაპხაც მაშინვე გაიღვიძებს.

— რაღას უცდიან მერე? — იკითხა დედა მტრედმა.

— აბა, ვინ რა იცის, სად, რისთვის, როდის და როგორ წავიდეს? თანაც დაუაპშის დედამ რა ხანია კუდიანი დედაბერი გაგზავნა შავი ბარტყისათვის. იმ დედაბერს ალბათ ნახევარზე მეტი გზა ექნება გავლილი. თუ დაუაპშის დედამ შავი ბარტყი უმალ მოიგდო ხელში, მაშინ თეთრ ბარტყს ძალა დაეკარგება და ყველაფერი უცვლელად დარჩება, ყველა დევი გაცოცხლდება, — დაამთავრა ამბავი მტრედმა.

დიდყურამ რომ ეს ამბავი მოისმინა, მეგობრები დაძებნა. ცოტა ხნის შემდეგ სასახლის ეზოს ერთ მყუდრო კუთხეში თავი მოიყარეს ირმის შვილმა ჯამხუხმა, გრძელხელამ, ქვისფეხამ, ხელმარჯვემ, ხვრებიამ და დიდყურამ, მრა-კაპხას დედასაც დაუძახეს. დიდყურამ ყველაფერი დაწვრილებით უამბო მეგობრებს, რაც მტრელებისაგან გაიგონა.

მეგობრები პირდაღებული უსმენდნენ დიდყურას. მერე ერთმანეთს გადახედეს. ფიქრის დრო არ იყო. პირდაპირ საქმეს შეუდგნენ. ბარტყის მოყვანა ქვისფეხას დაავალეს. მას უნდა გაესწრო გაგზავნილი დედაბრისთვის, ეპოვა ბუდე და თეთრი ბარტყი წამოეყვანა. ქვისფეხამ სიტყვის დამთავრება არ აცალა, ისე გავარდა დავალების შესასრულებლად.

გაქანდა ქვისფეხა ზღვისკენ. არც მთებს შეუშინდა, არც კლდეებს. წუთსაც არ კარგავდა უქმად. გზად მიმავალმა სვია დაგლიჯა და კალათი დაწნა, ბარტყის წამოსაყვანად გამომადგებო. გათენებისას გავლილი ჰქონდა შვიდივე მთა და შვიდივე ველი. ზღვის პირას მიიღბინა, კალათი ჯიბეში ჩაიდო და მიიხედ-მოიხედა. შორიახლოს ფიჭვნარი გამოჩნდა. შევიდა ფიჭვნარში და სწორედ მინიშნებულ მინდორსაც მიაღება. შუა მინდორზე მართლაც ტოტებგაშლილი ცაცხვი იდგა. ქვისფეხამ მაშინვე ბუდეს დაუწყო ძებნა. ძირიდან კენწერომდე შეათვალიერა უზარმაზარი ცაცხვი და ერთ-ერთ კენწეროზე შავი ბუდე დაინახა. სწრაფად ავარდა ხეზე, ჩაიხედა ბუდეში. მადლობა ღმერთს, ორივე ბარტყი ადგილზე დახვდა.



— უჰ! — შვეებით ამოისუნთქა ხის კენწეროზე წამო-
 ჯდარმა ქვისფეხამ. ხუმრობა საქმეა, სამი დღის საგანგა-
 ერთ დღეს გაიარო! ამდენი ამბის შემდეგ ქვისფეხა ერთ-
 ბაშად დაიღალა. ერთ ხანს იჯდა და ბარტყებს დაჰყურებ-
 და. ბოლოს აიყვანა თეთრი ბარტყი, კალათაში ჩასვა და
 ფრთხილად ჩამოვიდა ხიდან. კალათა ჯიბეში ჩაიდო და
 იქვე მოჩუხჩუხე წყაროს დაეწაფა. მერე ხელ-პირი დაიბა-
 ნა, ქვაზე ჩამოჯდა და ზურგით ცაცხვს მიეყრდნო. იფი-
 ქრა, ცოტას შევისვენებო. ყაბალახი მოიხსნა და ოფლიანი
 შუბლი ნიავს მიუშვირა. მალე მზის პირველმა სხივებმა
 გამოაჰყიციეს. დილის ნამი ბალახზე ბროლივით აციმციმ-
 და. იმ არემარეში არავინ ჩანდა. ქვისფეხას ძილი მოერია.
 ყაბალახი თავქვეშ ამოიდო და წამოწვა. დაღლილობისა-
 გან და დილის საამო სურნელისაგან გაბრუებულს უცებ
 ჩაეძინა.

ქვისფეხას რომ მკვდარივით ეძინა, ამ დროს ფიჭვნარ-
 ში მგელი გამოჩნდა. ზურგზე დედაბერი ეჯდა და რაც ძა-
 ლი და ღონე ჰქონდა მორბოდა. დედაბერს თავზე დიდი
 თავსაფარი ეხვია, თავსაფრის ერთ ბოლოს ქარი უფრია-
 ლებდა. მეორეში კი რაღაც ჰქონდა გამოკრული. დედაბერს
 პატარა ფუთა ეჭირა. როგორც კი გამოვიდნენ ფიჭვნარი-
 დან, დედაბერმა მაშინვე შენიშნა ცაცხვის ქვეშ მძინარე
 კაცი. შეაჩერა მგელი და ძირს გადმოხტა. ფეხაკრეფით მი-
 უახლოვდა მძინარეს. კუდიანი მაშინვე მიხვდა, რომ ეს
 იყო თეთრი ბარტყის მაძიებელი. მან დიდხანს უცქირა მძი-
 ნარეს. მშვენიერი, მხარბეჭიანი ვაჟკაცი გამოტილიყო
 გულალმა და არხეინად ხვრინავდა.

დედაბერმა ხის ძირას მიაგდო ფუთა, თვითონ საჩქა-

როდ მოებლაუჭა ფრჩხილებით ხეს და მალლა აცოცდა. ბუ-
დეს ეცა და რას ხედავს, თეთრი ბარტყი უკვე წაუყვანიათ,
ხელი დაავლო შავ ბარტყს და ძირს დაეშვა.

ქვისფეხას ისევ მშვიდად ეძინა. თეთრი ბარტყი უეჭვე-
ლად ამ კაცს ეყოლებოდა. კუდიანმა ქვისფეხა აათვალიერ-
ჩაათვალიერა. ჯიბეების გაჩხრეკა კი ველარ გაუბედა, შე-
ეშინდა, ვაითუ უცებ გაიღვიძოსო. ვინ იცის, როდის დაი-
ძინა, — ფიქრობდა დედაბერი. — ალბათ, საცაა გაიღვი-
ძებსო. ფრთხილად აიღო თავისი ფუთა და მძინარე ქვის-
ფეხას გვერდით დაუდო. თვითონაც იქვე ჩაცუცქდა, ფუ-
თას ხელს უსვამდა და ბუტბუტებდა:

კრუხო, კრუხო, ბებერო,
კვერცხისმდებლო!
თორმეტი კვერცხია — თორმეტი დადე,
თორმეტს დადებ — თორმეტი დაილაგე,
თორმეტს დაილაგებ — თორმეტი გამოჩეკე,
თორმეტს გამოჩეკავ — თორმეტი წია,
ჩიპი, ჩიპი — თორმეტი წია!
ფუუ, ფუუ, ფუუ!

დედაბერმა სამჯერ შეუბერა ფუთას და ხელი გადაუ-
სვა. იმავე წამს ფუთიდან თორმეტი წიწილა გამოხტა. ლა-
მაზი, ქრელი ფრთები ჰქონდათ, ყვითელი ნისკარტები და
წერტილივით პატარა თვალები. ისინი მოგროვდნენ დედა-
ბრის წინ. კუდიანმა გამოხსნა თავსაფრის ბოლოში გამო-
კრული ფეტვი. მაშინ სიმინდის მაგივრად ხორბალს ან
ფეტვს თესავდნენ. გზად მიმავალმა კუდიანმა ფეტვის ყა-
ნები გამოიარა, ჯიბეები თავისთავად ავსებოდა ფეტვით.

„აი, ფეტვი სად გამომადგა“, — წამოიძახა გახარე-



ბულმა კუდიანმა და მთელი ფეტვი თავზე გადააყარა ქვის-
 ფეხას. წიწილები კისრისმტვრევით მისცვივდნენ და
 წყეს ფეტვის კენკვა. საამო ნიაგმა და წიწილების ტკბილ-
 მა ქლურტულმა უფრო ღრმად ჩააძინა ქვისფეხა.

დედაბერსაც ეს უნდოდა.

„ახლა კი ვიცი, სადამომდე ტკბილად იძინებს“, — გა-
 თფიქრა დედაბერმა, ხელი დაავლო შავ ბარტყს, შეაჯდა
 თავის რუხ მგელს და უკან მოკურცხლა.

ნაშუადღევი იყო. ჯამხუხი წამდაუწუმ გამოდიოდა სა-
 სახლის აივანზე და ზღვისკენ იცქირებოდა. მისი მეგობ-
 რები ეზოში დაღონებულნი დაეხეტებოდნენ. მრა-კაპხას
 დედა მიჯდომოდა შვილს და ქვითინებდა. ზოგჯერ ისიც
 მიადგებოდა ფანჯარას და გზას გაპყურებდა. მათ ერთი
 სურვილი ჰქონდათ: ქვისფეხას მოესწრო ბარტყის მოყვა-
 ნა. მაგრამ ქვისფეხა არ ჩანდა.

მალე მთის ერთ-ერთ მწვერვალზე შორიდან გამოჩნდა
 შავი წერტილი. ვერ გაარჩევდი ადამიანი იყო თუ ცხოვე-
 ლი. ხალხში ჩოჩქოლი ატყდა, ყველა აივანზე გამოვიდა.
 ერთმანეთს არ აცლიდნენ, როგორც იქნა, გაარჩიეს, მაგ-
 რამ, ვაი ამ გარჩევას; მთიდან მოჰქროდა ცხენი თუ ჯორი,
 ზურგზე თავსაფრიანი ქალი ეჯდა. ყველას ენა ჩაუვარდა—
 ეს იყო კუდიანი დედაბერი.

ხალხმა იმედი დაკარგა. ქალებმა თმა გაიწეწეს, ატყ-
 და კივილ-წივილი. დედაბერი უკვე კარგად მოჩანდა. იგი
 უზარმაზარ რუხ მგელზე იჯდა. მგელი ძლივს მოძუნძუ-
 ლებდა. უცებ დიდყურამ დაიჩოქა, ყური დაადო მიწას და
 ყვირილით წამოვარდა:

— ჰაიტ, დაუძინია ქვისფეხას. მისი ხვრინვა მესმის.

გრძელხელამ სიტყვა არ დაამთავრებინა, წამოავლო ხელი სათამაშოებით მორთულ ბოძს, რომელზეც წინაღობა ჯამხუხი ავიდა, ამოგლიჯა, მალა შეათამაშა და ზღვისკენ გასტყორცნა. ბოძი ჰაერში დატრიალდა, გაქრა და იმ ცაცხვის ხეს დაეცა, საცა ქვისფეხას ეძინა. ხმაურზე ქვისფეხას გაელვოდა.

— ოჰ, როგორ ჩამძინებია, — თქვა მან და წამოვარდა. მიიხედ-მოიხედა, ნაცნობი ბოძის ნამტვრევები დაინახა. წიწილები ძლივს მოიცილა თავიდან. ყველაფერს მიხვდა.

შეწუხდა ქვისფეხა, მაგრამ რაღას იზამდა. ჯიბეები მოისინჯა, კიდეც კარგი, ბარტყიანი კალათა ადგილზე იყო. წამოავლო ხელი ყაბალახს, თავზე მოიხვია და შურდულივით გავარდა. წამსაც არ კარგავდა. ტყვიასავით მიჰქროდა, მიარღვევდა მთებს, ტყეებს, მინდვრებს, ქაობებს, კლდეებს...



— შეხედეთ, დაუაპში იღვიძებს, ცოცხლდება! — ახმაურდნენ აივანზე.

— ვაი ჩვენს მოსწრებას! გაიღვიძებს და უარეს დღეს დაგვაყრის.

— ჯამხუხ, შენ უნდა გვიშველო რამე!

— ჰო, მხოლოდ შენ შეგიძლია გვიხსნა, აგვაცდინო უბედურება! — გაისმა ყოველი მხრიდან.

ახლოვდებოდა მგელზე ამხედრებული დედაბერი. ადაუს გვარი იღვიძებდა. როცა დედაბერი მთიდან დაეშვა, დაუაპშმა ხელ-ფეხი გაანძრია, უფრო მოხერხებულად და-

წვა. დედაბერი ისე ახლოს მოვიდა, აივნიდან შეიძლებოდა მისი ცნობა. დაუაპში უკვე იატაკზე წამოჯდა და ხელებს დაეყრდნო. ირმის შვილმა ვეღარ მოითმინა, ხმალამოდებული შეიჭრა დაუაპის ოთახში. დაუაპში ფეხზე წამოიშარტა, სკამი აიღო და ჯამხუხს მოუქნია. ჩასისხლიანებული თვალები ბოროტებით ავსებოდა. ჯამხუხმა მოასწრო გვერდზე გახტომა და კარს ამოეფარა. თორემ თავს წააცლიდა მძლავრად მოქნეული სკამი. ზუსტად რომ ვერ მოზომა, გამხეცდა დაუაპში და კართან მიიჭრა. ჯამხუხმა იმარჯვა, ხმალი მოუქნია და ორი თავი წააგდებინა. მაგრამ ჯამხუხმა ამოსუნთქვაც ვერ მოასწრო, მოკვეთილი თავები აგორდნენ და ისევ მოეზნენ დაუაპს კისერზე. ერთხელ კიდევ შეუტია ჯამხუხმა და დაუაპს ერთიმეორეზე წააგდებინა სამივე თავი. ესეც ამაოდ. თავები ისევ ჩვეულებრივად მიება დევს. ორივენი ძალზე დაიღალნენ, მაგრამ კუდიანის მოახლოებაზე დაუაპს თუ ძალა ემატებოდა, ჯამხუხს თანდათან აკლდებოდა. საბრალო ოფლად იღვრებოდა. უცებ გაახსენდა ჯამხუხს მოხუცის ნათქვამი და თავის ხალხს გასძახა:

— აუ, ხალხნო, გაიქეციოთ და საჩქაროდ მომირბენინეთ ნაცარი და ნაკვერცხალი.

ხელმარჯვემ და დიდყურამ მაშინვე წამოავლეს ხელი ნიჩბებს, ბრძანება თვალის დახამხამებაში აასრულეს. დაუაპმა როგორც კი შენიშნა ხელმარჯვე, შიგ მუცელში ესროლა შუბი. ხელმარჯვეს შუბი თეძოში მოხვდა და კედელს მიაკრა, დაჭრილს ხელიდან ნიჩაბი გაუვარდა. ნაცარი და ნაკვერცხალი დაიფანტა. ამ დროს ჯამხუხმა ისევ მოჰკვეთა დაუაპს ორი თავი. თავები დაფანტულ ნაკვერ-

ცხალზე გაგორდა. სისხლი მაშინვე შედედდა. დაუაპში შეყოვნდა. ჯამხუხმა დრო იხელთა და მესამე თავიც წაადებინა. დიდყურამ მაშინვე დააყარა დევს თავზე ნაკვერცხალი.

დაუაპში შეტორტმანდა და მთელი ძალით დაენარცხა ძირს.

ხმაურზე გრძელხელა შემოვარდა, ხელმარჯვეს თეძოდან შუბი ამოაძრო და ფანჯრიდან შორს გასტყორცნა. მერე დიდყურასთან ერთად მიუბრუნდა დაჭრილ მეგობარს, საწოლზე დააწვინა და კრილობა შეუხვია.

ირმის შვილმა ოფლი მოიწმინდა. თავზე ხელი გადაისვა და აივანზე გავიდა. გაიხედა და რას ხედავს — გრძელხელას გასროლილი შუბი კუდიანის მგელს მოხვედრია. შუბზე აგებული მგელი უსულოდ ეგდო ძირს. წყეული დედაბერი სასახლისაკენ გამორბოდა.

ამასობაში ქვისფეხაც გამოჩნდა.

— იჩქარე, იჩქარე! ცოტალა დაგრჩა, — სასახლის ეზოდან უყვიროდნენ ქვისფეხას.

— გზა მიეცით, გზა! — დაიყვირა ერთმა.

ხალხი ორად გაიყო, ქვისფეხას გზას უთმობდა.

დედაბერს სწორედ ეზოსთან დაეწია ქვისფეხა, დაეწია და კიდევ გაასწრო, პირდაპირ აივანზე ისკუბა. სულმოუთქმელად შევარდა დაუაპშის დედის ოთახში. თან მიჰყვნენ ჯამხუხი თავისი მეგობრებით, მრა-კაახას დედა, ხელმარჯვეც კი წამოაყენეს ლოგინიდან და ძლივძლიობით შეიყვანეს ოთახში.

ჩაბნელებულ ოთახში თეთრ საწოლზე იწვა დაუაპშის სულთმობრძავი დედა. იგი ცხრად მოკეცილიყო, დანაოჭე-

ბული სახე მუჭისოდენა გახდომოდა. ამ პატარა სახეზე კაკვივით ცხვირი ეკიდა, თვალებს ქურდულად აცეცებდა.

როგორც კი გაუსწრო ქვისფეხამ დედაბერს და ეზოში შეიჭრა, დაუაპშის დედას მაშინვე ღონე გამოეღია, მოითენთა.

სამარისებური სიჩუმე იდგა. ქვისფეხამ საჩქაროდ მოხადა თავსახური კალათს და თეთრი ბარტყი გაუშვა. დაუაპშის დედამ ერთი კი გაალო პირი, ღრმად ამოისუნთქა. ცხვირ-პირიდან ცეცხლის ალივით ამოვარდა ბოროტი სული და ნაპერწკლების ცვენით გაჰყვა ბარტყს.

ცოტა ხნის შემდეგ დიდყურას ყურები შეუტოკდა. მერე დიდი ყური თანდათან დაუპატარავდა და ჩვეულებრივი გაუხდა. ხალხმა ამ სასწაულის დანახვა ვერც მოასწრო, რომ უცებ ქვების ნამტვრევებით აივსო იქაურობა. მოიხედეს და ქვისფეხას ფეხებზე აღარც ერთი ქვა არ ება. გრძელხელა პირდაღებული იდგა, გრძელ ხელს დაყრდნობოდა და გაოგნებული შეჰყურებდა გახარებულ მეგობრებს. მან ვერც იგრძნო, როდის დაუმოკლდა ცალი ხელი. პერანგის ცარიელი სახელო სასაცილოდ ჩამოეკიდა. ხელმარჯვე ულამაზეს ჭაბუკად იქცა, ქალიშვილები თვალს ვეღარ აშორებდნენ.

ხვრებიაც ასევე შემჩნევლად ტანწერწეტა ვაჟაკა გახდა. ღიპის ნაკვალევიც არ ეტყობოდა.

ჯამხუხი ის იყო, მრა-კაპხასთან წასასვლელად მიბრუნდა, რომ უცებ ირმის ბეწვი ჩამოცვივდა. მრა-კაპხას დედამ ჯამხუხის ტიტველ ხელზე მაშინვე შენიშნა წითელი ხალი.

— ჩემი ჯირი, — დაიძახა ქვრივმა და ჯამხუხს გადა-

ეხვია. მერე ახალუხის ღილები შეუხსნა, მეორე ხალი გაუსინჯა. — ჩემი ჯირი, ჩემი ძვირფასი ჯირი! — ქვითინებთან ჯამხუხს ეხვეოდა.

ამ დროს აივანზე ხალხი აჩოჩქოლდა.

— გზა მიეცით, გაატარეთ! — გაისმა ხმები.

ხალხი გაიწ-გამოიწია. ყველა ერთ მხარეს იხედებოდა. რაღაცას ელოდა, მართლაც, თითქოს მზის სხივი შემოიჭრაო, გამოჩნდა მრა-კაპხას გაბრწყინებული სახე.

— დედა!

— შვილო!

ქვრივმა ხელი გაუშვა ჯამხუხს და შვილს გადაეხვია. აოცნით რომ გული იჯერა, უთხრა:

— აი, ეს არის. შვილო, მე რომ გიყვებოდი, ჩემი ჯირი, ახლა ამას ირმის შვილს ჯამხუხს ეძახიან.

მრა-კაპხამ შეხედა ჯამხუხს. ირმის შვილმა ვერ გაუძლო მის ბრწყინვალეობას და თავი ძირს დახარა.

დიდი ღხინი იყო. ხალხი დევების ტყვეობიდან განთავისუფლებას ზეიმობდა. მრა-კაპხა — სიცოცხლის დაბრუნებას, ჯამხუხი — ძმებთან შეხვედრას, მრა-კაპხას დედა კი — ქალიშვილის დახსნას ავი სულეებისაგან, ჯირის პოვნას და საყოველთაო ბედნიერებას.

მაგრამ... ყველაფერს თურმე თავის დრო და საზღვარი აქვს. ასევე მხიარულებასაც.

ზეიმის შემდეგ შინ უნდა დაბრუნებულიყვნენ. ყველას

მიუწევდა გული ოჯახისკენ. როგორც იქნა დადგა ეს ნი-
ტრი დროც.

დათქვეს გამგზავრების დრო, ადგილი და დაიშალნენ.

ამ წუთიდან ყველას თავისი საქმე გაუჩნდა. ზოგი სა-
კუთარ ნივთებს ალაგებდა, ზოგი საგზაულს ამზადებდა, ზო-
გი საქონლის წაყვანაზე ზრუნავდა.

გამგზავრების დროც მოვიდა. დაუაპშის ეზოში მოიყა-
რეს თავი. მხოლოდ მწყემსები არ იყვნენ, ნახირს ადრია-
ნად გაჰყოლოდნენ. მრა-კაპხა და დედამისი წუთებს ითვ-
ლიდნენ. ყველაზე მეტად ჯამხუხსა და მის მეგობრებს ეჩ-
ქარებოდათ.

ყველას ერთნაირი საზეიმო განწყობილება ჰქონდა.
თითქოს ამინდიც კი ხარობდა მათან ერთად; მზე განსა-
კუთრებით ხალისიანად ანათებდა, ცააც სარკესავით მოწ-
მენდილი იყო.

ირმის შვილმა ჯამხუხმა და მრა-კაპხამ პირობა მის-
ცეს ერთმანეთს, სამშობლოში დაბრუნებისთანავე დაექორ-
წინდეთო. ქორწილის დღეც დანიშნეს. მრა-კაპხას დედა
ნეტარებით შეჰყურებდა სასიძოს და ქალიშვილს. მის სი-
ხარულს საზღვარი არ ჰქონდა. ბედნიერი იყო ჯამხუხი,
მაგრამ მაინც რაღაც დარდი აწვალებდა, მოსვენებას არ
აძლევდა. ვერ იქნა და ვერ გაიგო იმ ძმის ამბავი, დღემდე
რომ თავით ატარებდა დიდ სიმძიმეს. ვის არ ეკითხებოდა,
თვითონაც დაეძებდა, მაგრამ ვერაფერს უთხრა სიმართლე,
ვერაფერი გაიგო. იმედგაწყვეტილი ჯამხუხი შინ ბრუნდე-
ბოდა.

წასასვლელად გაემზადნენ. ამ დროს ერთი კაცი გამოჩი-

ნდა, მოდიოდა და თავზე უზარმაზარი სახლი ედგა. უცნობი მგზავრებს რომ მიუახლოვდა, გაჩერდა.

— გამარჯობათ თქვენი!— მიესალმა იგი, თავიდან სახლი ჩამოიღო და გვერდზე დადგა. ძალ-ღონით სავსე, კუნთმაგარი ვაჟკაცი ჩანდა. თურმე ცოტა ხნის წინ, შინ მიმავალი მწყემსები შეხვედროდნენ და დაწვრილებით მოეთხროთ ჯამხუხისა და მისი ძმების ამბავი. ესეც მაშინვე გამოეშურა ძმებთან შესახვედრად.

გადაეხვივნენ ახლად შემოერთებულ ძმას და ყველაფერი გამოჰკითხეს.

— რომ იცოდეთ, როგორ მომბეზრდა მარტო ხეტიალი. დღეიდან არც ერთი წუთით არ მოგშორდებით, — უთხრა მან ძმებს.

გახარებულმა ძმებმა იგი კიდევ ერთხელ ჩაიკრეს გულში და ბედნიერებისაგან გაბრწყინებული სახეებით განაგრძეს გზა.

დაბრუნდნენ სამშობლოში. დაიწყეს ბედნიერი ცხოვრება. სულ მალე დიდი დოვლათი დაუგროვდათ. რაც სულსა და გულს უნდოდა, არაფერი აკლდათ.

ს ს რ რ ი ვ ი

მაქითათის ნაამბობი

თარგმანი ა. ბეწაძისა 5

ჯამბუხი

თარგმანი მ. ჯაფარიძისა 87

რედაქტორი ც. ჩხაიძე
მხატვრები თ. ჭიშკარიანი, დ. დუნდუა
მხატვ. რედაქტორი შ. დოლიძე
ტექნიკური ლ. ქვარცხავა
კორექტორი მ. ლაღაძე

ხელმოწერილია დასაბეჭდად 17/V-68 წ.
ქაღალდის ზომა 70×108¹/₃₂
ნაბეჭდი თაბახი 2,875
სააღრიცხვო-საგამომცემლო თაბახი 3,42
უე 00269 ტირაჟი 5,000 შვევ. 1674
ფასი 17 კაპ.

გამომცემლობა „ნაკადული“, მარჯანიშვილის, 5
Изд. «Накадули», ул. Марджанишвили, 5

საქართველოს სსრ მინისტრთა საბჭოს ბეჭ-
დვითი სიტყვის სახელმწიფო კომიტეტის მთა-
ვარაულოებრადმრეწველობის სტამბა № 2
„ნაკადული“, თბილისი, ფურცელაძის, 5
Типография № 2, «Накадули», Главполи-
графпрома Государственного Комитета Со-
вета Министров Грузинской ССР по печа-
ти, Тбилиси, ул. Пурцеладзе № 5

C(A6x)2
894.611.3.32
632



7—3—3

Хашба Мушни Лаврентьевич
Рассказ Макитата
(На грузинском языке)
Детюниздат Грузинской ССР
«Накадули»
Тбилиси
1968

მ. 172/220



1670000
2023/03/13

